

كلنا بنتمني نعيش مغامرة ولما بنحاول نتخيل ممكن تكون إيه؟
 ما بنوصلش؛ لأن ببساطة عقلنا ببسرح لبعيد... لأبعد من خيال مؤلفين
 سيناريو فلم هندي بحت... عقلنا ببسخر مننا لما يرجع للمنطق...

بس اللي مش عارفينه، إن المنطق أكبر مخادع، قادر يخلينا أبطال رواية
 حقيقية من غير ما نشعر، فلولا إن المغامرات اللي أتخيلناها وحسينا
 بالسخرية منها حصلت وبتحصل في الدنيا حقيقي... ما كنش قدر عقلنا
 يستوعبها ويصورها لينا علي هيئة مشاهد...

ما فيش خيال ناتج من اللاشيء، الخيال عالم خفي من المنطق اللي لسه
 ما عشناهوش.

هو ده اللي قدرت أنا كطارق في سن الثلاثين أفهمه، وده بعد مغامرتي
 اللي ممكن تكون بالنسبة لناس كثير حاجة عادية، ولناس تانية مجرد قصة
 مش حقيقية... بس هي بالنسبالي مغامرة غيرت حياتي وقلبت كل
 الموازين..

آه أسف.. نسيت أعرفك بنفسي الأول، أنا طارق حسن... مدير للعلاقات
 الخارجية في شركة تصنيع أدوية، أتعينت هنا جديد من كام شهر بس،
 الحقيقة مش فاكرك عددهم لأن النهارده عقلي مش مركز غير في حاجة
 واحدة هقولها لك في آخر كلامنا... المهم

بيتقالي دائماً إني مناسب للمكانة دي بسبب شكلي، يعني هما شايفين إن
 علشان عيوني رمادية زي والدتي، وملاحى شقرا زيها، بجانب جسمي
 الرياضي لطبيعة هوايتي كمدرّب فيتنس، وهي في نفس الوقت مهنتي
 التانية، فبكدّه انا لائق لمنصب مدير، أنا بوافقهم جداً بس عندي مشكلة
 واحدة بس... وهي طولي، طولي اللي نفسي أشوفه ميزة زيهم مش

عارف...193 سنتي كافلين بأنهم يخلوني أقدم طلب للهجرة لمدينة
الزراف!!

برغي كثير وعايز المفيد!

حاضر هحكيلك بس ثانية بس هربط رباط الكوتش قبل ما انزل...ايوه،
معاك أهو..نكمل

أنا أبان ليك من مظهري، شاب روش، مقضيها، فاهم كل حاجة وعايز كل
عادي، حياتي مليئة بالأحداث والبشر...بس الحقيقة أنا شخص مسالم جداً،
بتغدي بطاطس بالفراخ وملوخية، وأنام بدري علشان الشغل عادي!

أه مجتهد في شغلي، زي ما كنت مجتهد في دراستي بس حياتي عادية،
أيامها شبه بعض بس الجديد إن الفترة الأخيرة زهقت الحقيقة من تكرار
جملة عايزين نفرح ببيك يا طارق، فرح بباك ومامتك ببيك يا طارق،
مافيش حاجة ده ولا كده يا طارق؟ مع غمزه وابتسامة اللي هو ها اسمها
إيه بقي! وأنا والله آخر بنت عرفتها وجذبتني كنت في تالته ثانوي في
درس الفيزياء، عجبني الشوز بتاعتها كانت لون شنطتها، ولما ركزت
معاها عجبني ملامحها وفضلت أحلم بيها أيام وليالي وأختار أسماء أولادنا
لحد ما طلع اسمها كرستينا وقررت أني أفضل سنجل بكرامتي..

بقولك إيه أنت مش فاكرا أنا ركنت عربيتي فين أمبارح؟ أه صح أنت
ماتعرفنيش أصلاً هتعرف أنا راكنها فين أزاي?...معلش بقي قلتك مش
مركز غير في حاجة واحدة، أهى العربية طلعت قدام العمارة أهى، تعالي
بقي نكمل جوا العربية...

أكملك بقي..

أهى العربية دي كانت محور كل حاجة، بداية البداية لحياتي الجديدة...في
اليوم التالت ليا في الشغل الجديد لما ركنت عربيتي قدام الشركة ونزلت
بعد نهاية اليوم وشوفتها، خفت...كانت واقفة ثابتة قدام العربية ما

بتتحركش، مقدرتش أركز في ملامحها بس فاكر تفاصيل منها، بنت في العشرينات، بطقم جيب وشميز فورمال وعليهم خمار طويل، لفت انتباهي وقفها قدام العربية وتركيزها فيها لدقايق ومشيت! مابقتش فاهم في إيه؟ بس عادي يعني ما اهتمتش..

بس إن الموضوع يتكرر ثاني يوم لما كنت ببص من شباك المكتب بالصدفة قبل ما اخرج منه علشان أروح بيتنا، وألاقي البنت خارجة من عندنا من الشركة وقدرت اعرفها من خمارها ولبسها الفورمال، بصت يمين وشمال، لفت حوالين العربية بهدوء أرعيني، ونظرتها ثابتة، وقفت في نفس المكان اللي وقفت فيه اليوم اللي قبله، قدام العربية بالظبط... طلعت تليفونها وبصت فيه ورجعت بصت للعربية بصة خلتنني أخذت مفاتيحي وشنطة اللاب توب وجريت علي تحت انزل أشوف عايزة إيه من عربيتي!.... بس للأسف مالحقتش؛ كانت مشيت..

ما كنتش قادر افهم هي شغالة إيه في الشركة؟ طيب عربيتي إيه المشكلة فيها؟ طيب

هي عجاها وبتخطط لسرقتها؟

إيه ده؟ هي بتعمل إيه؟؟؟

في اليوم الثالث كنت براقب العربية من الشباك من وقت للتاني بتعجب وتوتر، مش قادر أركز في الشغل، لحد ما شوفتها

خرجت من الشركة بدري وقفت ورا العربية، مدت أيديها بهدوء علي شنطة العربية وفضلت واقفة بهدوء، فجأة مدت أيديها في شنطتها طلعت ورقة وقلم كتبت حاجة وحطت الورقة فوق شنطة العربية ومشيت... مشيت وهي عينيها ثابتة علي العربية بابتسامة عجيبة، للحظات فكرت اتصل بالبوليس، ما هي يا حرامية وبتخطط لسرقتها، يا مجنونة رسمي، يا عليها عفريت.. وأخر فكرة جت في خيالي هي اللي خلتنني أتراجع إنني اتصل علي البوليس، وانزل أشوف الورقة اللي كتبتها الأول، ما هو أصل مش

معقول تكون دي صاحبة كريستينا وجاية تنتقم مني بعد العمر ده! وهي ما كانتش تعرف أصلاً إن في كائن حي اسمه طارق..
نزلت وفتحت شنطة العربية ولقيت الورقة، كتبت..

"bmw E36....اختيار مميز..أهنتك"

جننتي، طول اليوم بلف في البيت بفكر، تقصد إيه؟ تهديد ده طيب؟ ياترا ناوية علي إيه؟

روحت الشغل وأنا مش نايم، الجملة بتتردد في دماغي، دوشة أفكار، مع تكتيكات مفتش مُحترف بخطط أقدر أفهم لغز البنات دي أزاوي؟
لحد ما اخدت القرار الحاسم...

فضلت مراقب طول اليوم الوضع، لحد ما جه الميعاد، أول ما شوفتها نزلت بالأسانسير جري بفكر هتخايق معاها أقول إيه؟ وياترا هي هتعتترف من البداية ولا هنضطر نروح القسم؟

وقفت قريب منها ولأول مرة أفهم معني النظرة اللي من بعيد تبان ثابتة، أول مرة أغير من عربية علي حد معرفهوش أصلاً! كنت حاسس نفسي أتجننت فعلاً وأنا شايف ابتسامتها الهادية، ونظرة الشغف والحنين اللي بتلمع مع لون عينيها العسلي في ضوء الغروب، فجأة حسيت البلطجية صاحبة الخطة الداعشية، طفلة فرحانة بلعبة في فاترينة زجاج!

ابتسمت ووقفت وراها بهدوء عايز اكلها بس مش عارف هقول إيه؟ غير أنا ليه مش عربية ويتبصلي البصة دي؟ في اللحظة اللي بفكر فيها انسحب قرر القدر يلعب معايا وتلفوني يرن وهي تلتفت، وتشوفني، وتتخض...

هي اتخضت ووشها احمر وارتبكت، أنا بقي حسيت إنني عايز أتجوز ليه وقتها واعمل شهر عسل في اليونان مش فاهم!

فضلت مصدومة لكام ثانية مش عارفة تتصرف، وبترتب خمارها اللي أول مرة أحبه علي بنت، كان دايماً فكرتي عن الخمار الطويل ده أنه لبس أمهات، بس هي غيرتلي الفكرة...مش علشان لابساها، علشان اللي لسه هحكاه ليك في اللي جاي

أشغلك المكيف؟ أصل طريقنا لسه طويل.. لا؟.. تمام أكملك...

بحاول امنع ابتسامتي، باصصلها بثبات وترقب، أيدي ورا ضهري ونفسي ارفع راسي لفوق علشان أبان شرير، بس مع الأسف فرق الطول محسني أني عايز أطبب عليها واهديها من الارتباك اللي بتعانده، لكنها ببساطة فاجأتني لما أخذت نفس طويل، وبصتلي بعده وهي رافعة راسها لفوق بثقة وسألتنني:

- تبيعها بكام؟

ماقدرتش امنع نفسي من الابتسام، جريئة رغم هدوء ملامحها وطبيعة لبسها، سألتها:

-الدرجة دي زوقي حلو في العربيات؟

بصت للعربية بتلقائية ورجعتلي بنظرتها الواثقة وهي بتداري ابتسامتها، بنفس الثبات قالت:

-معاك bm تبقي فاهم كويس إن في أحدث وأحلي منها كمان...بس بسأل لو كنت حابب تبيعها يعني حابت أعرف السعر

حطيت أيدي في جيوبي وأنا ببادلها نفس نمط أسلوب الحديث الماكر بتاعها:

- طيب وبما إنك بتفهمي في العربيات وعندك معرفة بموديلات الbm الأحدث والأحلى وجاهزة تشتري، ليه ما تشتريش منهم وماتجيش تتألمي العربية بتاعتي كل يوم؟

فاجئها كلامي وكنت عارف بس حابب أشوف رد فعلها، وهزمت ثباتها ولا هتعمل إيه؟ لكن أنا اللي في النهاية وقفت قدامها مهزوم ومش عارف أرد، بان علي ملامحها الصدمة والارتباك اللحظي، واللي ماستسلمتس ليهم ولقيتها بنقولي بابتسام:

لما بنطمح لحاجة، لازم سقف طموحنا يبقي عالي...بس ماينفعش ننط
نطة كبيرة علشان نطوله، بنختار السلم المناسب اللي يوصلنا بخطوات
لفوق علي قد خطواتنا...وأنا حسب خطواتي، أول خطوة ليا هتكون
bmw E36 سوده مستعملة أو كسر زيرو علشان أوصل للm6..
ها ناوي تببيع؟

بصتلها باندهاش، وانبهرت بطريقتها، وبكلامها ومش مصدق إني بتكلم
مع بنت عن موديلات عربيات أحلامها واللي بتسعي أنها تكون أول عربية
توصل بيها لعربية أحلامها، هي عربية أحلامي أصلاً...فضلت باوصلها
بإعجاب ومش فاهم المفروض أرد بأيه، لقتني مرة واحدة بسألها:
- هو أنتي بتشتغلي في الشركة هنا؟

حسيت سؤالي ضايقها وبجمود قالت:

-أنا مش واقفة مع حضرتك علشان نتعارف، عموماً إن حضرتك قررت
تببيع العربية فأنا هكون من أوائل الناس اللي تحب تشتريها..بعد أذنك

أتحركت من قدامي وخطت خطواتها بعيد عني علشان كل الثبات اللي فيا
ينهار والثقة الزيادة، والكبر ينسوني للحظات وأروح بسرعة وراها أوقفها
وأسألها:

-طيب و حضرتك هتعرفي لو هبيعها أزاى؟

بنقة قالت:

-بتفحص كل يوم لو كان فيها إعلان بيع ولا لا...تتهني بيها بإذن الله، بعد
أذنك.

أنا مدير وليا برستيحي آه، شخص ثلاثيني ناضج طبعاً، واثق في نفسه ده شيء أكيد، مش أي حاجة تشغل بالي ده بدون شك يعني، بتبصلي كده ليه مش مصدقني؟ أنا بتكلم جد والله بس هي دلوقتي اللي قدرت تطلعني كداب في الحاجات الواثق منها فيا... قدرت تخليني طول الطريق ببتسم والمشهد بيتكرر في دماغي، مش ملان بل عايز أعيده كل شوية في دماغي؛ علشان أحس بالحماس اللي حاسه ده... حبيتني في عربيتي اللي كنت جايها ومختارها بحب أصلاً..

تاني يوم كان يوم أجازة، كنت بفكر طول اليوم إيه وظيفتها جوا الشركة؟ وليه مش بشوفها جوا كتير؟ وإيه رد فعلها بعد ما عرفت إنني عرفت إنها بتأمل عربيتي كل يوم؟

في اليوم الثاني قررت لما هروح الشركة هسأل عنها وأعرف فين مكتبها، بس القدر الحقيقة ما كنتش وقتها عارف هو حالفني الحظ ولا عاندني...

لأنه في الوقت اللي عرفت وظيفتها إيه هو الوقت اللي كانت بتفقدتها فيه... كان حدث عمل ضجة كبيرة في الشركة، ماكنتش فاهم إيه بيحصل في الأول وليه في ربكة؟ وشايف كل كام موظف مجتمعين وسايبين شغلهم وبيتوشوا، والمديرين وفريق ال Hr في حالة عصبية وارتباك؟

سألت سكرتيرة المدير العام قبل ما أدخل الاجتماع عن السبب علشان أفهم منها إن سلسبيل اللي أنا مش عارف هي مين؟ وهي المفروض واحدة من المتدربين عندنا في الشركة في قسم ال Hr أتمنع تعينها في القسم بسبب رفضها لشروط من شروط المدير العام... طيب إيه الشرط وإيه المشكلة؟

قبل ما تقولي سمعنا باب المدير بيتفتح فجأة التفت ورايا علشان أتفاجئ وأنا شايفها خارجة

عينيها بتقول كلام كثير ومش عارف من أمتي وأنا بفهم لغة العيون بس أنا شوفت نظرتها وهي بتستنجد، شوفت ملامح تعب كانت محبوسة وظهرت في تكشيرة ودموع محبوسة في عينيها المطفية، كان في حماس شوفته أول مرة بصيت في عينيها من يومين ما شوفتوش في اليوم ده، حسيت إني اختنقت وأنا واقف مش فاهم في إيه؟.. ثواني عدت كأنها أيام، الكل بيبصولها بنظرات بيختلط فيها الشفقة مع الحزن، وبعض الواقفين الحقد بيتشرح في ابتسامتهم الشمتانة...

عدت من قدامي وماسكة في أيديها ملف وشنطتها، وعينيها مابصتتش لحد غيري قبل ما تمشي.. سألت بسرعة السكرتيرة، مين دي؟

-دي سلسبيل يا استاذ طارق اللي المدير رفض يعينها..

المدير طلب السكرتيرة وباقي المديرين للاجتماع، كان لازم أكون موجود جوا بس ما قدرتتش أعاند فضولي وروحت ورأها، كنت حاسس إني مش هالحقها، كنت بتمني حد يوقفها ولو لحظات لحد ما أوصلها، والمره دي كنت ممتن جداً لعربييتي لأنها قامت بالمهمة دي...

ابتسمت لما لقيتها واقفة قدام العربية لكن بسرعة أتبدلت الابتسامه لقلق وحزن لما ركزت في ملامحها، ونظرة الوداع اللي كانت بتبص للعربية بيها، كانت ماسكة بأيديها خمارها بقوة وأيديها بتترعش، وأيديها الثانية اللي محتوية الملف ضاغطة عليه قبضتها بنفس رعشة الأيد، عينيها بتقاوم الدموع، لما شافتني قدامها أتتهدت والتفتت علشان تمشي

-أستاذة سلسبيل..

وقفت والتفتت لي وبصتلي بثبات وثقة، وكان كل الزحمة والخنق اللي
جواها اختفوا، ابتسمت ابتسامة مافهمتش معناها إلا في آخر حديثنا،
ابتسامة حسرة وقالت:

-لو حضرتك بتنادي ليا علشان قررت إنك تبيع العربية، فأنا بعنذر.. لأول
مرة برجع في كلمة ليا، مافيش أحلام بتتحقق لبنت لابسة ملاية لف علي
شعرها!! بعد أذنك...

الجملة كانت مُريية ومؤلمة وكنت مستغرب إيه اللي هي بتقوله ده؟
افكرت وقتها جملة السكرتيرة (أتمنع تعينها بسبب رفضها لشروط من
شروط المدير العام..)
أتكلمت بسرعة وقتلتها:

-سبب الرفض كان الخمار مش كده؟
وقفت تاني ورجعت خطواتها وهي بصالي بغضب، صوتها احتد وهي
بتسألني:

-حضرتك مين علشان تسألني الأسئلة دي مش فاهمة؟

ابتسمت وبصيت في ساعتني وقتلتها:

-أنا تقريبا اللي هترقد بعدك لان عندي اجتماع بدء من دقائق، أنا طارق
حسن، مدير العلاقات الخارجية في الشركة...وحابب أعرف مشكلتك إيه،
فلو تسمحيلي من وقتك كام دقيقة تشربي فيهم قهوة في مكتبي لحد ما
اخلص الاجتماع وأجي أفهم منك!

ارتبكت، وحسيت براحة بسيطة زارت ملامحها من كلامي، بس تكون عاقلة وراسية وتقبل بهدوء كده؟ لا أراي ما ينفعش..

-متشكرة أنا مش عايزة مساعدة من حد، أنا مابستسلمش وفي ملايين الشركات في مصر وبرا مصر وأنا عندي طاقة وصبر وهكمل...شكراً لاهتمامك أستاذ طارق.

ضحكت غصب عني وقتلتها وأنا بمد أيدي ليها تجاه باب الشركة وبقولها:

-كان المفروض الشرط يكون التخلي عن العناد مش الحجاب.. أطلعي يا سلسبيل ونعاند فوق...يلا مافيش وقت.

طلعنا في الاسانسير وكنت سعيد زي المراهق اللي أول مرة يشوف بنت حلوة، بس الحقيقة حلاوتها ماكانتش بالنسبالي في الشكل بس، كنت حاسس أن لسه جواها أحلي، مش عارف في إيه حصلي من وقت ما كلمتها أول مرة وعقلي راح فين، بس كان جوايا حاجة بتقودني أعرفها أكثر...ممكن فضول لأنني مُتأكد بأنها مُميزة..مش عارف، كانت مرتبكة وخجولة، رغم ثباتها وراسها المرفوعة دائماً، دخلت مكنتي وطلبتلها قهوة وبسرعة دخلت غرفة الاجتماعات، ما كنتش محتاج أعتذر عن تأخري لأن الوقت ماكنش متحمل أي كلام زيادة والمدير وشريكه بيتجادلوا قصاد بعض، قعدت مكاني وأنا منتظر أشوف إيه هيتم علشان انفاجيء باللي ماكانتش متوقعه المدير بعصبية:

-أنا حنة عيلة ترد عليا، وتقف قصادي وتقولني ما علشان هي عنكم باللبس مش بالمجهود المدير العام مش عارف ياخذ قراراته الصح اللي

تنقذ صفقة زي اللي بتضيع منه دي وتسيبها تمشي عادي من غير ما
أحبسها؟

!

أنا كطارق واللي شغلي أني أتعامل مع المشكلة دي واللي أتعينت
مخصوص علشانها ماقدرش أقف قدام أستاذ معترز وأقوله كده،
انبهرت... هي أزاي جريئة كده؟ رد عليه شريكه أستاذ صالح بنفس
الغضب وكلنا قاعدين نتفرج بصمت:

-بغض النظر عن أني مش موافق علي مظهرها إلا إن البننت ما غلطتتش،
لو حضرتك مش عارف تاخذ قرار حاسم في موضوع الصفقة اللي جاية
من ألمانيا ده وتتعامل فيه مع طارق يبقي نقفلها أحسن!.. بصلنا كلنا وقال،
كل واحد فيهم من جهته ووظيفته تجاه الصفقة دي في خلال 48 ساعة
تكونوا جاهزين بدراسة كاملة ليها وتلاقوا اقتراحات للحل... وحوار البننت
ده يتقفل مش عايز أسمع عنه في الشركة... أتفضلوا علي مكاتبكم..

دخلت مكنتي لقيتها قاعدة علي الكرسي اللي قدام المكتب ماسكة دفتر
وبتكتب فيه حاجة وأول ما دخلت قفلته بسرعة وحطته في
شنتتها، بصراحة كان عندي فضول جداً أعرف إيه الدفتر ده، وكانت
بتكتب فيه إيه؟ قدامها فنجان القهوة خلصان وعينيها مليانة انتظار
بشغف.. مش هنكر ابتسمت، قفلت الباب وقعدت علي كرسي مكنتي
وبصتلها وفضلنا ساكتين ونظرتها بتسألني، ها وبعدين؟
-إيه حكايته؟

استغربت سؤالي وابتسامتي، ردت بتلقائية:

-أنا كنت بتدرب وكل حاجة عديتها باجتهاد، ويوم ما المفروض أتعين
أطلب مني أغير الخمار علشان أليق بهيئة الشركة، اللي المحجبات فيها
عملة نادرة...بس كده

ابتسامتي زادت واستندت علي المكتب وقتلتها:
- تُو تُو.. مش دي، حكاية سلسبيل، مش مشكلتها...

بصتلي باندهاش وسألتني:
-تقصد إيه؟

--أقصد أنتي مين؟ وإيه سر جرأتك وأحلامك!

-وإيه يلزمني أقول لحضرتك حكايتي وتعرف حياتي؟

اعتدلت وقلعت جاكيت البدلة وحطيته ورايا علي الكرسي، وقتلتها بعد ما
أخذت نفس طويل:

ده مش إلزام، عندك حرية أنك تختاري تقولي إيه وماتقوليش إيه، بس أنا
ببلغك إني حابب أسمعك، مش علشان أي حاجة غير أنني حاسس أنك
تستاهلي تنولي فرصة أن حد يسمعك بدون هدف...وأنا بالفعل مش ورايا
هدف...ممكن؟

بصتلي بصة طويلة، حسيت أن البصة دي كان فيها كل اللي محتاج أسمع
بس مش قادر أترجمه، بصت للملف اللي في أيديها وبصتلي، وقامت

وقفت وأخذت شنطتها وبدون كلام راحت عند الباب وفتحته علشان
تمشي..

للحظات حسيت باليأس، وأني أتماديت معاها وهي ما تعرفنيش، ماقدرتش
أتكلم بحرف زيادة بس زعلت، خرجت من المكتب وقلت الباب وراها،
خذت نفس قوي بعصبية، وكانت ناقصة كمان الباب يخبط في الوقت ده،
رديت بعصبية:

-انفضل..

لقيتها بتفتح الباب وبتدخل وتقف قدام مكتبي تحطيلي الملف اللي في أيديها
قدامي، ابتسمت وسمحتها تقعد، من غير أي كلام فتحت الملف وكأنها
مُصرة تصدمني طول الوقت، عمرها 25 سنة وخبرتها تفوق ده بكثير،
معاها لغات تعادل اللغات اللي انا أتعينت بيها مدير في سن الثلاثين،
اشتغلت في كذا مجال وكل حاجة اجتازتها بجدارة، انبهرت لما شوفت
ال CV بتاعها وانبهاري الأكبر أنها بنت عادية من طبقة متوسطة، لبسها
مُحتشم وهادي، ملامحها بتدي انطباع غير الحقيقي تماماً، تركيبة متناقضة
بس مختلفة وجميلة، قتلها وأنا سعيد باللي شوفته جوا الملف:

-أزاي؟

لاحظت ابتسامة خفيفة بتهرب منها ولمعة عينيها بترجع وهي بتحكي:

-عندي كنز ليه مفتاح، لازم أغامر علشان أفتحه...ومع المغامرة بيتوجب
عليها أجمع نقاط قوة أقدر بيها ألقى المفتاح اللي هنول بيه الكنز ده.

من طبعي مش بحب الألبان، بس طريققتها بئثير محبتي أني أسمع أكثر،
حاسس باستمتاع من لباقتها في الكلام، واختيارها للجمل اللي بتوصف
بيها، سألت:

-كنز أيه ده؟

--فخر..فخر والد ووالدة ما عندهم مش غير بنت وحيدة حابين يشفوها أحسن
حد، بس هي عايزة توصل لكل الناس أنهم أحسن حد في الدنيا لأنهم
وصلوها لمكانة عالية...هما يستحقوا علشان كده بغامر من سن
صغير...الكورسات والشهادات والخبرات دي كلها مش من سنة أو اتنين،
أنا من سن 15 سنة وأنا بسعي وبجتهد

حببت كلامها جداً، وكنت حابب أسمع أكثر ومش فاهم أزاي مش هيكونوا
فخورين بيها وأنا فخور بس بأني سمعت منها الجملتين دول، سألتها:

-ياااه، 10 سنين، طيب وناوية علي أيه؟

ابتسمت ابتسامة جانبية بسخرية وقالت:

-لأ ما خلاص...عارف حضرتك!! أنا رغم كل قراراتي الصبح، أول مرة
أحس بأني أخذت قرار صح حقيقي فعلاً، يبقى بالنسبالي هو أقوى تحدي

سألتها بتعجب:

- قرار إيه ده؟

--أنني ألبس الخمار...أنا كنت بحجاب وبناطيل ولبس عادي من شهور
فانت، بس أنا قررت أكون مرتاحة أكثر وراضية عن نفسي أكثر

فلبسته...ماكنتش أعرف أنه هيبقي عائق أني بعد ما أوصل لأول الهدف الحقيقي، هيوقني ويقول يا أنا...ياللي أفنيتي حياتك علشانه طول ال10 سنين..

زعلت علشانها جداً وحاولت أواسيها لكنها فاجئتني، ضحكت جامد وقالتلي بنظرة كلها إصرار:

- أنا مش زعلانة يا أستاذ طارق، أنا مابستسلمش، أنا لو كنت وصلت للهدف بالسهولة دي كنت هحس أن في حاجة غلط، أنا مش هتخلي عن الخمار.. وهشتغل شغلانة تليق بمجهودي وفي شركة كبيرة زي دي، وهتقبل زي ما أنا حتي لو فضلت أعافر سنين تانية...مش أستاذ معتز أبو كرش اللي هيوقني عن حلمي...

ضحكت جامد، جريئة للحد اللي خلاها تتكلم بالشكل ده عن مديري وماتخفش مني...حببت قوتها..

قبل ما تمشي طلبت منها تسيللي الCV بتاعها وخلال ساعات هتصل بيها أقولها تاخده تاني...وطبعاً علشان أعمل ده وتوافق كان في مقابل، ومش عارف الحقيقة مين المدير ومين الموظف اللي بندورله علي شغل!

طلبت تعرف أنا ليه أهتمت لمشكلتها وروحت ورآها علشان ألحقها قبل ما تمشي، وكان المقابل هو أني أجابو بشكل صريح...بس أنا كدبت:

-سمعت منهم وأنتي في مكتب المدير أن عندك كفاءة عالية، وعندك حل للصفقة اللي الوفد الألماني مشي قبل ما يتعاقد معنا عليها والفرصة الأخيرة لينا فيها ومش عارفين نستغلها عندك فكرة ليها...فكنت متفاجيء وحابب أسمعك

كانت ذكية للحد اللي يخليها تفهم أني بحور، بس علشان ماتحرجنيش
جابتها في كلامها بشكل غير مباشر، وسألتنني:

-وهما عرفوا أزاى إن عندي حل للمشكلة دي وأنا أصلاً مابلغتتش حد
باللي بفكر فيه؟

رديت بسرعة وأنا بحاول أبان واثق من نفسي وأهرب من الموقف:

-بيتوقعوا..

بصتلي بخبت وقالتنلي:

- اممم، طيب وحضرتك ماسألتننيش عن أي حاجة في حوار الصفقة،
وبتسألني عني ليه؟

مالحقتش أجاب، وكل حاجة فيا أتجمدت لما باب المكتب خبط ودخل
أستاذ معتز فجأة وشاف سلسبيل قاعدة قدامي وبتكلم...وقفنا وكل حاجة
وقفت حتي أنفاسي، ماكنتش عارف أتصرف أزاى وهي واقفة...نظرة
الغضب اللي كانت في عينيه وصدمة وقتها قالتنلي أني في موقف لا يحسد
عليه أحد...

أنك تكون راجل قوي.. أو ضعيف، أو عايش مش فاهم أنت مين في الحياة!.. فأنت تكون في موقف حرج ومعاك امرأة قوية أطلقها في الساحة وأتعلم.. هنكتشف إن في حاجات في الدنيا لسه أنت ما عرفت هاش عن البنات!

كان لازم أتصرف بسرعة بس مافيش فرصة لأي كلام ولا تصرف، فبمجرد ما أستاذ معتز دخل وشافها قدامه وشه أحمر من العصبية كأنه هينفجر في وشنا، بصوته العالي الغضبان:

-البنى أدمة دي بتعمل إيه عندك في المكتب، هو أنا مش لسه طاردها من الشركة؟

لسه هتكلم لقيتها بهدوء بصتلي وابتسمت وقالتلي:

-متشكرة جداً علي وقت حضرتك يا أستاذ طارق، وهستني من حضرتك رد...

أنا طبعاً أبتسمتلها زي العبيط مش فاهم الهدوء ده جابته منين؟ ومين اللي المفروض يشكر مين علي الوقت؟ كنت متأكد أنها هتخرج ومش هترد

عليه وأنا هترفد بعدها، بس أمتعتني بتصرفها، وكنت سعيد أوي وأنا شايفها بتقرب من أستاذ معترز وبترفع راسها كالعادة وترد بثقة، ونبرة صوتها احتدت والراجل في ذهول قدامها وخلاص هيخرج نار من دماغه من الغضب:

-أولاً اسمها خرجت وسابتك وأنت مش عارف ترد علي كلامها الحقيقي اللي أهان برستيغ حضرتك، ماسمهاش طردتها من مكتبي لأنك أصلاً مش هتاخذ الفرصة أنك تعمل ده..ثانياً وده الأهم هييجي اليوم اللي هتحتاج فيه أم ملاية لف علي شعرها وهتندم علي عدم احترامك ليها...بعد أذنك يا..أستاذ معترز.

خرجت وقفلت الباب ورآها وأنا بنطق في سري الشهادتين، بدأ يزق ويتكلم عن إن أزاي أدخلها الشركة تاني؟ ورد أيه اللي هي مستنياه؟ وال CV بتاعها بيعمل إيه علي مكتبي؟ وأنا واقف بهدوء باصصله بتقرب وأيدي ورا ضهري، كنت عارف أن ده هيستفزه أكثر، وأنه هيثور عليا والحقيقة ماكنش في دماغي أي فكرة بس كنت بحاول أستجمع قواي علشان أقدر أتصرف، وأعرف المفروض هعمل أيه بالظبط؟ خبط علي مكتبي بكفوفه الاتنين، اتفزعت لكني كتمت رد فعل الفزع جوايا علشان تظهر عليا رجفة بسيطة وهو بيسأل:

-أنت مش بترد عليااااإيه؟ هو أنا مابقاش حد يحترمني في أم الشركة دي؟

ابتسمتله وبهدوء خرجت من مكاني ووقفت قدامه وحاولت أقعده علي الكرسي علشان يهدي وقتله:

-العفو يا أستاذنا، أنا بس عايز حضرتك تهدي وسايبك تخرج كل غضبك
علشان نعرف نتكلم... هطلبك قهوة، روق بس ومافيش حاجة تستدعي
العصبية.

-- قهوة أيه أنا مش عااايز قهوة، أنا عايز أفهم كانت بتعمل عندك أيه؟

-طيب نهدي ونتكلم؟

خرج زفير قوي وقعد علي الكرسي وأرخي ظهره لورا، وأنا وقفت
طلبت لينا أتنين قهوة وقعدت علي الكرسي اللي قدامه، وبدأت أتكلم:

-فاكر حضرتك يوم ما أنا أتعينت في الشركة واجتمعت بيا قتلتي أيه؟

باصلي بغضب وساكت مستنيني أكمل، كنت بتمني وقتها أكون مُدخن
علشان أعزم عليه بسيجارة ينفث فيها غضبه بدل ما يطلعه عليا، كملت
كلامي بنفس نمط الهدوء:

-حضرتك وقتها قتلتي أن الصفقة اللي أترفد بسببها المدير اللي قبلي أهم
صفقة في تاريخ الشركة والفرصة الأخيرة لاسترجاعها في أيدي أنا، وأنك
ساييلي حرية التصرف والمرة دي أنت مش هتديني القرار والحل..بس
هتستني نتيجة ولما هنقذ الصفقة أو ما أنقذتهاش هيكون في مكافأة أو عقاب
بس حضرتك ما حطتتش الشروط، أنا لقيت الحل...

وقتها نجحت في أني أهدي أعصابه شوية وأديله أمل في حاجة أنا بغامر
فيها بدون حسابات بالفعل، مال بجسمه لقدام وابتسم وسألني بحماس:

-بجد!! وأيه هو الحل؟

كنت حاسس أنني عايز أقوم أجري الحقيقة ما أنا مش عارف أيه الحل؟
وأيه اللي أنا بعمله ده؟ بس كنت لأول مرة في حياتي بغامر، القهوة
وصلت فسكتنا لحد ما السكرتيرة خرجت، قلت:

-سلسبيل..

كل حاجة رجعت أسوأ من الأول وموجة الغضب زادت عنده، أتعصب
وزعق:

-البت دي أنا قلت ماسمعش أسمها في الشركة تاني، أنت عايز تحصلها
كلمني عنها تاني..

قام وقف وكان هيمشي، لقيتني بقف قدامه وبمنعه، وبكلمه بالحاح ماكنتش
فاهم سببه مني، بس كان عندي ثقة بأنها مش هتخذلني وبرضه مش
عارف جبت الثقة دي منين؟

-أستاذ معتز اسمعني للأخر بس وبعدين قرر...سلسبيل مُمتازة جداً وعن
ثقة، هي اللي من برا الموضوع قدرت تلاقي الحل وكان ممكن أنها بعد
مُعاملة حضرتك ليها تسبب الخسارة ليك عادي، بس هي ما عملتش كده
وقررت تبلغني أن في حل وأنها قادرة تعمله...كده كده الصفقة دي يا
خسرانه يا كسبانه، وإحنا ما عندناش الحل لأنهم مش قابلينه مننا فنسيبها
تجرب...وأنا اللي هحط العقاب والمكافأة ليا..علشان أتحمّل عواقب اللي
عملته، تمام؟

-- وياترا أيه هو حلها بقي؟

ارتبكت ومابقنتش عارف أرد، لقيتني بسرعة بقول:

-الحل هنسيبه ليها بس تديها فرصة، خليها تشتغل تحت إدارتي و علي حسب الشرط اللي هنتفق عليه، الحوار ده خلال أيام يكون أنتهي اتفقنا؟

بصلي بخبث ورجع قعد مكانه ومسك فنجان قهوته وقبل ما يشرب منه سألني:

-وأيه عقابك لو ماكسبناش الصفقة؟

بلعت ريقني وأخذت نفس طويل وقتلته:

-هترفد معاها ومش هرجع الشركة تاني..

سأل بتحدي:

- طيب والمكافأة؟

ابتسمت وأنا بقعد وأمسك فنجاني وأقوله:

-سلسبيل هنتعين وتجوز هالي في نفس اليوم...

أتصدم وخط الفنجان علي المكتب وسألني:

-أجوز هالك؟...

بصتلته بتحدي:

-هو مش حضرتك قلتلي بما أنك صديق والدي الله يرحمه أنك هتحل محله
وتخطبلي وقت ما أختار البنت اللي أقرر أتجوزها؟...وأنا اختارت..

ضحك بقوة وقبل ما يخرج من المكتب قالي بتحدي:

-وأنا موافق يا طارق... عارف ليه؟..علشان أنت اللي هتخذل نفسك في
النهاية..

عدي يوم الشغل من غير ما أحس بيه، معظم الوقت بفكر هعمل أيه؟ أزاي
حطيت نفسي في الوضع ده؟ تصفحت ال CV بدقة...كل حاجة مرسومة
باحترافية، عقليتها موزونة وحريقة شغل يعني كانت ثقتي في محلها، بس
برضه كنت مُتسرع وبغامر لأنني لحد الآن مش عارف بالفعل عندها الحل
ولا لأ، واللي زاد الوضع سوء لما فجأة لقيت السكرتيرة بتناديلي وبنقولي
أن أستاذ مُعتر مجمع الشركة كلها في الريسبشن تحت وعايزني، نزلت
فوراً وأنا مش فاهم في أيه؟...النظرات كلها قسداني وتتاملني بشكل
غريب، علشان اتفاجيء أنني بتحط قدام تحدي أسوأ مما كنت
متوقع...الشركة متجمعة علشان كل فرد فيها يعرف إن سلسيل هترجع
وهنتعين بشكل مؤقت وأنها لوحدها هي وأستاذ طارق اللي هو تعيس الحظ
أنا..أحنا اللي هنرجع الصفقة وكل حد كان مطلوب منه يتعامل مع المشكلة
هيسيبها، ولو خسرناها هنترقد قدام الشركة كلها، ولو رجعنا
الصفقة...هنتكافيء قدام الشركة كلها..

كان يوم صعب عليا، بس المميز فيه أني شفتها، وسمعتها... وحببت شخصيتها جداً... خرجت علشان الأقيها في وشي وده فاجئي جداً، واقفة ساندة علي العربية بتاعتي بضرها، وماسكة بأيديها كوبايتين عصير ومن الواضح أنه فراولة، بس هي منين عرفت أني بحب الفراولة؟؟

روحت تجاهها وأنا فاتح دراعاتي باستغراب وبقول:

-يا ربي أيه اليوم اللي مليون جنان رسمي ده؟ أنتي عرفتي منين أني بحب الفراولة؟

ضحكت جامد وأول مرة أشوف ضحكتها وأحب حاجة تانية غير الفراولة، استغربت الضحكة لقيتها بتمد أيديها بالعصير ليا وبتقولي:

-هي الفكرة أني لما بحب أهادي حد، أو أعزمه علي حاجة لأول مرة تكون حاجة أنا بحبها...صدفة أكيد أنا هعرف منين! ضحكت أنا كمان وقدرت أنسي للحظات هم اليوم، سألتها:

-أنتي واقفة هنا من أمتي؟ وليه؟

بصت في ساعتها وقالت بابتسامة:

-من 3دقايق تقريباً، ليه بقي؟ فده علشان أعرف هسافر ألمانيا أمتي؟

من الصدمة كنت بدل ما هبلع العصير هغرقها بيه، كحيت جامد وبعدين
بصتلها باندهاش وسألتها:

-يعني أيه؟

--يعني وصلني أنك أقنعت المدير أنني أخذ فرصة، وخطيت لنفسك شرط
جزائي علشان الفرصة دي، معني ده أنك وثقت في الحل بتاعي اللي
بالمناسبة أنت أصلاً مش عارفه!!... فأنا هعرف منك سبب الثقة دي بس
مش دلوقتي، لما أكون في محلها لأن مافيش وقت للأسئلة... الوفد الألماني
هيروح شركة تانية خلال يومين يتعاقد معاهم، فلازم ألحقهم وده هيكون
من خلال أن أنا اللي أروح ليهم... وده اللي يحفظهم ماء وجههم بعد
المعاملة اللي عاملها ليهم أستاذ معتر والمدير اللي قبل حضرتك، وختهم
يمشوا.. فيها هسافر أمتي؟

مليون سؤال بيترددوا جوايا عايز أسألهم مش عارف أرتبهم، باصصلها
بانبهار حقيقي، سألتها:

-عرفتي منين المعلومات دي؟

أخذت نفس وبصتلي وبابتسامتها اللي بتبلغني بيها أنها هتفاجئني أكثر،
قالت:

-بما أنني معايا ألماني، لما كنت في الشركة يوم خروج الوفد متعصب كنت
واحدة معايا في اليوم ده سينابون أنا اللي عملاه، وزعت منه علي
أصدقائي في الشركة وأفضل معايا في العلية اللي في شنتي، فلما عرفت
أنهم خارجين بالشكل ده خرجت جري وقفتم أتكلمت معاهم كفضول مني،
وعلشان أكون علاقات.. وعرفتهم بنفسي علي أنني أصلاً شغالة في

الشركة، وتأسفت ليهم نيابة عن الكل وعزمت عليهم بالسينايون، وكونت
معاهم معرفة لذيذة، وعرفت منهم أن في شركة ثانية هيتعاقدوا معاهم بما
إن شركتنا عاملتهم المعاملة دي وبيلاعبوا معاهم في السعر المُتفق
عليه... فهمت ليه أنا الوحيدة اللي تقدر تحل المشكلة؟

كنت بشرب العصير وباصصلها باندهاش اللي هو مش فاهم دماغها دي
متركة أزاى؟ بعد ما خلصت كلام وهي مُبتسمة بانتصار وثقة لقيتني
تلقائي بمد ليها أيدي بمفاتيح عربيتي، استغربت وبصتلي بحماس بتسألني
أيه ده؟ بتلقائية ومحبة للي أنا بعمله قتلها...

-هتعر في تسوقي الE36 لحد ما أجبلك الموافقة وأجي تاخذينا نروح
نخلص ورق السفر، ولا هتدغدغيها؟

شوفت في عينيها فرحة ومفاجأة أدوني طاقة غريبة كفيلة تخليني أروح
وأديها ألمانيا بنفسى، نظرتها وفرحتها جواهم طفلة صغيرة أدركت أنهم
مش سهل يظهروا لحد، وحببت كون أني شوفتهم

-حضرتك بتتكلم جد؟

--بتعر في تسوقي؟

أخذت مني المفاتيح وكانت قربت تتنطط من الفرحة، بصتلي بامتنان قبل
ما تركب العربية وقالتلي:

-مش عارفة أنا محظوظة، ولا دي مكافئة من ربنا... بس شكراً لأن
حضرتك هنا..

دورت العربية وبصتلي بابتسامة ولهفة قبل ما تتطلق باحترافية خلنتي
أقتنع أنني في فلم هندي ودي مش بني آدم زينا، بطللة من الأبطال اللي
شخصيتهم مرسومة بامتياز وبدقة، مشيت وأخذت عقلي معاها وأتبقى ليا
صوتها في آخر جملة قالتها، ونظرة السعادة والامتنان الأخيرين يحفزوني
أطلع لمكتب المدير تاني... وكانت أسوأ اللحظات اللي قابلتني في المغامرة
دي قبل بداية المغامرة كلها، نزلت من عنده واستنتتها قدام الشركة مش
عارف هو اجهها أزاي، هقولها أيه وأزاي وأكسر فرحتها وحماسها؟

شوفتها وهي بتركن حاولت ابتسم بس ما قدرتش، ماتعودتش أنقل أخبار
سيئة لحد، وقفت قدامي ونظرتها السعيدة أتحولت لقلق، مدتلي أيديها
بالمفتاح وسألت بانكسار:

-موافقش مش كده؟

-- سلسبيل أنا حاولت وال...

قاطعتني بسؤال:

-هو حضرتك بجد كنت متوقع أنه هيوافق، بالسهولة دي؟

سألها بتعجب:

-ولما أنتي عارفة أنه مش هيوافق، ليه مامنعتنيش أكلمه؟

--علشان ببساطة ده اللي لازم يحصل، بس مش ده آخر سبيل نوصل
بيه...

سألتها وأنا محتار وهتجنن وأفهم دماغها فيها إيه:

- بتفكري في أيه؟

بصتلي بابتسامه وثقة ورفعة حاجبين، مستناني أتوقع، بصتلها وأنا بحاول
أعصر دماغي من التفكير لحد ما خطرت في بالي فكرة

- أوعي تقولي اللي في دماغي صح؟...

كملت كلامي وقلت:

-هتسافري من غير ما تاخدي الإذن؟

ضحكت والحقيقة ماكنتش مهتم إن كنت طلعت تافه قدامها بتوقعاتي اللي تحت مستوي أدني لتفكيرها، كل اللي شغلني لحظتها إنني مُستعد أعمل أي حاجة بس أشوفها بتضحك تاني، مش طبيعية في ضحكتها، ونظرتها، وكل شيء فيها مُميز حتى الابتسامة اللي بتتكلم بيها بعد الضحكة...

- لأ أكيد مش هعمل كده لأنني كده ممكن أتحبس فيها..

سألتها وأنا مُبتسم ومركز في ابتسامتها مش في كلامها:

-أومال بتفكري في أيه؟

بصت ورايا ورجعت بصتلي تاني بابتسامة حماس فهمت إنها عايزاني
أبص للي كانت بتبصله، التفت علشان أضحك وأبصلها تاني وأقولها:

-أنا مش عارف أنتي جايبه الدماغ دي منين!...وده هنتقعه أزاى؟

--هنتقعه..مش هنتقعه...

بصتلها جامد متوتر ومُتفاجئ، أنا مش جاهز أني أتكلم مع أستاذ جاد
تماماً، علي الأخص إن علاقتي بيه مش قد كده بما إنه شريك في الشركة
لكن مُعظم الشغل الإداري، والقرارات الخاصة بالشغل بيكون لأستاذ
معتز، أه ليه كلمته لكن ما جربتش أتكلم معاه في موضوع قبل كده، ومش
عارف المفروض أتعامل معاه أزاى؟...كان خلاص بيركب عربيته
وهيمشي ومش عارف أخذ قرار، وهي واقفة حتى ما بتدفعنيش أكلمه،
كأنها عرضت الفكرة ومتأكدة أني هعمل كده فعلاً، أو عايزاني أساعدها
بالفعل لكن من غير ما تطلب أو تنتقل عليا...بصيت عليه لقيته بيقل باب
عربيته، بصتلها بصره سريعة وأديتها كوباية العصير بتاعتي، وروحت ليه
بسرعة مش عارف لحقته أزاى حقيقي؟

دخلته العربية وقعدت قدامه وهو باصصلي باستغراب، ومنتظر أني ابدأ
كلام وأنا حقيقي مش عارف أبدأ أزاى؟ وأنا حاسس بالعجز، والخوف من
الرفض عينيا لمحتها من الشباك وراه، واقفة وعينيها بصالنا بخوف،
ضامه كفوف أيديها وشبكاهم ببعض ومقرباهم لقلبها وكأنها بتهديه، كنت
شايف شفايفها بتتحرك وكأنها بتتكلم، مش عارف بتقول أيه؟ بس كنت
متأكد أنها مش عارفة أني شايفها لذلك مش مدارية توترها اللي بتتجح
طول الوقت تداريه عني، لما شوفتها كده لقيتي بتشجع أني أعمل أي
حاجة، بتلقائية مديته أيدي بال CV بتاع سلسبيل وبقوله:

- سلسبيل عندها الحل أننا نقدر نرجع الصفقة، وحضرتك عندك علم
بالتحدي اللي حطني فيه أنا وهي أستاذ معتر...

مافتحش الملف، وفضل باصصلي من ورا نظارة الشمس بتاعته اللي مش
فاهم لابسها ليه 5 المغرب!... شال النظارة ونظرته الحادة ربكتني، بلعت
ريقي وأخذت نفسي وكملت:

- سلسبيل قادرة تقنع الوفد يمضي العقد بس أستاذ معتر رافض... وأنا
عارف أن حضرتك يهملك الصفقة دي جداً زينا فهتساعدنا.. فممكن؟

سألني بجمود:

- رفض أيه مش فاهم؟

بصتلته جامد وأنا خايف يديني بالجزمة الحقيقة، أنا عارف إن اللي هقوله
خُرافي ولكن... في خلال يومين بس، أتعلمت من سلسبيل أنني أجرب، وإن
المستحيل لو أتحول لصعب وبقي عندنا احتمال لحدوثه... هيجي اليوم اللي
نوصله...

-أصل علشان نقنع الوفد يمضي هنخلي سلسبيل تسافرلهم، هتقدر تتفاهم
معاهم وسفرها ليهم هيكون بمثابة تقدير ليهم، يخليهم يغفروا المُعاملة اللي
حصلت...

قاطعني بضحك عالي ورمالي الملف من غير ما حتى يبص فيه، كنت
عارف أن فكرتنا هيستهزأوا بيها، بس ماكنتش مُتوقع أن ضحكته هتخليني
أتحول بالشكل ده وأعاد أكثر، لقبيتني بسند ضهري لورا وبسمعله، قال:

-أه وهي بلبسها ده هتروح تقولهم إحنا أسفين معلش وانبي خدوا الورق أمضوه وأخر مرة والله مش هنعمل كده تاني، فهما نصعب عليهم ويوافقوا، صح؟

ابتسمت بسخرية من غير ما أبصله، وبصتله من المراية الأمامية وقتله بهدوء:

-أو تروح بحجابها المُميز، وعلاقتها الحلوة مع الوفد اللي طلبوا منها يعينوها عندهم لأسلوبها اللبق، وحسن تعاملها، وخبرتها وهي قالتلهم أنها هتفكر أكيد في العرض، وتعتذر ليهم عن الوقاحة اللي أتقابلوا بيها في شركة اسمها كبير كده...وتعزمهم علي فطار مصري أصيل تكلفته مش هتتعدى ال 250 ج في مكان بيقدم فطير وعسل وجبنة قديمة، فيجربوا حاجة من تراثنا فيتبسطوا، وتحسن العلاقة ويمضوا العقد معاكم بعدها وهما مالين كرشهم، ومتدلعين وراضيين جداً... ولا أقولك...

بصتله وأنا بفتح الباب علشان أنزل من العربية وقتله:

- أنت عندك حق، فكرة مُضحكة جداً، وبعدين عرضهم ليها كويس هي كده كده هتسافرلهم وتقبل الشغل معاهم هناك...

كنت حاسس نظراته بتخترقني وعايزة تقيدني في العربية من الفضول وعدم التصديق، كان لازم مايصدقش من الكذب اللي أنا كدبته ده ومش عارف نهايته أيه؟ لقيته بيسألني بلهفة بعد ما ندهلي ورجعت بصتله من الشباك:

-هي تعرف الوفد أزاى؟ وعرض أيه اللي بتتكلم عنه؟

ابتسمت وقتلته:

-آه نسيت أقول لحضرتك...ما الوحيدة اللي أتعاملت مع الوفد كويس يوم ما مشيوا زعلانين كانت هي...ما هي مش هتجيب الثقة والحل بتاعها من فراغ! ولا أيه؟

بصلي ولقيته بيقولي وريني الملف، ادتهوله تصفحه ولاحظت الإعجاب علي ملامحه بدأت أطمئن ومن جوايا بدعي أنه يوافق...لقيته بيقولي بمفاجأة:

-إيه ده ما شاء الله! كل دي انجازات ولغات؟ شكلي أول مرة هحط فيك ثقة وهتكون في محلها...

أتحمست جداً وسألته:

- يعني حضرتك موافق؟

--خليها تسافر بكره لو معاها الباسبور، ولو مش معاها تيجيلي بكره بدري الشركة وأنا أبعت معاها حد تخلص الورق مستعجل...

فرحت جداً ودخلت أيدي جوا الشباك وأخذت منه الملف، وقبل ما أمشي افكرت معترز أبو كرش فسألته بقلق:

-طيب وأستاذ معترز مش هنبلغه باللي هنعمله؟

بصلي بثقة وهو بيلبس نظارته وقال:

-لما نشوف قرارات مين فينا الأصلاح للشركة...خليني أنا المرة دي اللي ليا
التصرف...شوف توصلتم لأيه وكلمني بلغني..

شكرته وأتحرك بعربيته وأنا وقفت مكاني باصصلها بابتسامه، بصالي من
بعيد بترقب...اللهفة باينه في وقفها اللي مش ثابتة، ونظرتها اللي مستننية
مني إشارة، كنت واقف مكاني مش عارف أتحرك مع أي مُتحمس جداً
وعايز أجري بفرحة ليها زي العيال الصغيرة، بس كل حاجة وقفت مرة
واحدة، افكرت أول مرة شوفتها فيها من بعيد، ما كانتش ملامحها واضحة
ليا، ونظرتها كانت مشوشة بالنسبة ليا، بل كنت خايف منها....

ليه في الوقت ده حسيت أي شاييف كل تفاصيل ملامحها، وتعابير وشها
بوضوح، رغم أنها نفس المسافة تقريباً؟...حسيت يومها بالخوف رغم أن
عايز الموضوع ده يتم وأنها تحقق ذاتها لأنها تستحق، وكمان ده
هيساعدني في شغلي وأني أوصلها...بس أنا خفت عليها، كأنها عشرة
سنين، بنتي وهتسافر لأول مرة من غيري رغم أنها لأول مرة تظهر في
حياتي أصلاً...ركزت للحظة وحسيت بالجنان، هو أيه بيحصل ده؟ أزاى
طلبت من أستاذ معنز يطلبهالي للجواز وأنا أصلاً ماعرفهاش؟ أزاى كدبت
بالبساطة دي علشان أوصلها للي هي عايزاه؟...أزاى هي دخلتني في
تفاصيل كثير ومغامرة في يومين؟

لاحظت توترها من وقفتي فروحتلها ووقفت ووقفتي المعتادة قدامها، ضامم
أيدي ورا ضهري وباصصلها، سألتني:
-رفض؟

سألتها بثبات:

-تعرفي محلات بتقدم فطير وعسل وجبنة قديمة؟

بصتلي بعدم فهم، حاولت أداري ابتسامتي وقتلتها:

- علشان لما تجيبهم وترجعي نكون جهزنا المكان اللي هتعميهم فيه قبل ما يمضوا العقد.

بقولك أيه فاضل معاك قد أيه من الوقت؟... أه صح أنت مش معاك ساعة... حلو نص ساعة ونكون وصلنا، أنا متأكد أوي أنك هتحبها بسرعة زي ما أنا حبيتها

أيه! عايز تعرف اللي بعد كده؟... هقولك... هي يومها فرحت جداً، وكانت متشوقة جداً للسفر... ماكانتش مصدقة نفسها، كنت بتأمل ارتباكها، وفرحتها، والطفولة اللي ظهرت عليها تلقائي مجرد ما عرفت أنها هتسافر، خصوصاً لما عرفت أنه وافق تسافر ثاني يوم لو باسبورها جاهز، وهي دايماً جاهزة لأي حاجة هي عايزاها... قبل ما تسييني وتمشي بعد ما أخذت رقمها علشان أتواصل معاها، ونشوف هنعمل أيه لقيتها بتلف وتسالني سؤال عجزني:

-هو حضرتك بتساعدني ليه بالشكل ده؟

أنا كان عندي كلام كثير اختفي في لحظتها، أنا مش ضعيف، أنا مش مُراهق، أنا شخص ثلاثيني ناضج، عارف هو عايز أيه وليه؟ بس الحقيقة مش فاهم هي عملت أيه رجعتني لسن ال24 فجأة! ابتسمت وحاولت استرجع نفسي وقتلتها بهدوء وثبات:

-ده شغلي، مش لواحدك اللي بتحبي شغلك وبتعملي علشان مصلحة الشغل...

ابتسمت لي وسابتني ومشيت بس أنا حسيت بالسخافة من أسلوبي معاها،
كان لازم أكون مُحفز ليها أو علي الأقل أطف من كده..

بعد ما تواصلت مع أستاذ جاد، وبلغته باللي هيتم واتفقنا علي كل حاجة أنا
وهي وبلغتها ليه وكل حاجة جهزت، بصيت في الساعة أخيراً علشان
أتفاجئ أن الوقت عدي جامد الساعة عدت 11 بليل، دخلت المطبخ جبت
طبق البطيخ من الثلاجة والشوكة ومددت علي الكنبة وقلت أفتح وأتساب
أشوف لو كان في مسدجات مهمة، مافيش... كالعادة دخلت أبص شوية
علي التفاهة اللي الناس بتحطها علي الحالات كنوع من تضيع الوقت في
اللاشيء

قابلني أسمها، افكرت إني سجلت رقمها وأنها أكيد سجلت رقمي
فهتظهرلي حالاتها، كانوا تلت حالات ورا بعض، الأولي كانت بعد ما
سابتني بدقايق، دي صورة دفترها ايوا أنا فاكر شكله كويس، لكن فين
المكان ده مش عارف... كانت الصورة عبارة عن دفترها مفتوح ووراه
سما ونيل، وأيديها ماسكاه، تاريخ اليوم ومكتوب تحته جملة، (إن قدمت
علي شيء، كن صريحاً، جريء.. لا تأبه شيء حتى الخسارة)

وتحته جملة بنفس التاريخ ولكن مكتوب تحتها التوقيت اللي سابتني
ومشيت فيه تقريباً، (لا تحاول أن تأتي بما لا يأتي لأنك فقط شعرت بأنه
أتٍ لو هلة... فإن أراد أن يأتي فسيأتي رغماً عن أنفه!)

اعتدلت في مكاني وأنا حاسس بأني مش فاهم هي بتقول أيه بس الكلام ده
علياً، أنا حسيته، ربكني وقلبي دق بسرعة لما قرأته، إذاً هو علياً... قرأته
كثير ومافهمتش أو فاهم بس مش مستوعب، هي كانت مستنية مني أقول
حاجة فعلاً؟ بس حاجة أيه اللي كانت عايزه تسمعها مني؟

شوفت الحالة الثانية كانت صورة طيارة، والحالة الثالثة كانت فيديو لكلب
جيرمن صغير، وكاتبة تحت الفيديو (مع أول ترقية ليا هتبقى أنت مكافئتي
ليا ❤️)

حببت أوي ثققتها في نفسها ومن أكثر الحاجات اللي شدتني ليها، شيلت كل
حاجة دخلتها المطبخ، ودخلت نمت علي سريري مش عارف نمت أزاى؟
بس كل اللي فاكره أني كنت بفكر فيها وصحيت علي صوتها، وأنا مش
عارف أفرق بين الحلم والحقيقة، ما فوقتش إلا وأنا سامع صوت صمتها
ومش فاهم في أيه؟ ببص في شاشة التليفون بعد ما فتحت عينيا لقيتها علي
المكالمة ندهتلها وإذا بقنبلة ضحك انفجرت في وشي

-سلسبيل هو أنا قلت أيه؟

بصوتها اللي بيقاوم الضحك:

لو روحت المطار من غير ما حضرتك تفطر أو مليت وجبنة بطماطم
وبطيخ وتيجي تقابلني هناك هتفجر كرش أستاذ معتر وتعمل منه كروش
صغيرة!

كنت حاسس أني أهبل قدامها والظاهر مش هبطل حس الدعابة اللي بيظهر
عليها وقت النوم ده وهفضل أخرج مع الناس كده لأخر العمر، ضحكت
معاها وسألتها عملت إيه وقالت أنها دقائق وهتخرج تروح المطار، بصيت
للساعة باستغراب، دقائق ليه؟ ببص لقيت الوقت عدي وطيارتها ميعادها
خلاص قرب جداً...فضلنا نعانده في بعض هي مش عايزاني أجي، وأنا
بقول أني هاجي، أنا مش عارف ليه مُصر أني أروح وعارف أنها
هتستغربني...مافيش مُدير بيوصل موظفة عنده المطار علشان خايف علي

مصلحة شغله!!..بس ما همنيش حاجة وقتها، قفلت معاها وأنا عارف إني
مش هلحقها بس برضه هحاول

عقبال ما أخذت شاور، ولبست قميصي الكحلي، وبنطلوني الأبيض،
وجزمتي السوداء لون ساعتني الجلد وركبت عربيتي، كنت للأسف
أتأخرت وهي وصلت المطار، كان ممكن أراجع لما فتحت وشوفت الحالة
بتاعتها بأنها وصلت المطار، يعني بنسبة كبيرة مش هلحق أوصل لكن
الكلام اللي في الحالة هو كان أكبر دافع يخليني أطيّر بعربيتي لهنالك...

(رغم أن لكل حدوته بطل، والبطل قوته ما بنتهزش، بس وقت تحقيقه
للبطولة وفي اللحظة اللي بيخطي خطوته الأولي تحديداً، بيتملكه توتر
الدنيا كلها ويحس أنه محتاج ما يحسش أنه لواحد... لأول مرة، وأول
خطوة...وزي كل مرة أنا لواحد..أستودعكم الله)

كنت بجري بالسرعة القصوى اللي أقدر عليها علشان ألحقها والجملة
بتتردد في عقلي، رنيت عليها أول ما ركنت عربيتي ما بتردش، بصيت في
الساعة وأنا بدخل من صالة المسافرين...لسه فاضل وقت بسيط، هي ليه
ما بتردش، في الرنة الثالثة أخيراً ردت، سألتها بلهفة:
-أنتي فين؟

وصفتلي المكان وروحت بدور عليها مش لاقياها، يمين وشمال مش لاقياها،
لفيت ورايا برضه مش موجودة، قبل ما أرن عليها لقيتها بتناديلي من ورا
ضهري التفت لها، ما كنتش عارف إن كان تحقيق الحلم اللي بيحلي؟ ولا
التوتر بيزيدها أنوثة؟

ابتسمت جامد وأنا بتنفس بصعوبة من اللف والجري لقيتها بتمدلي أيديها بكوباية عصير فراولة، فهمت ماكنتش لقيها ليه فضحكت وأنا باخدها منها، قالت:

-أكلت الأومليت ولا أتصل بأستاذ معتز أظن علي كرشه؟

ضحكت جامد، وسألتها علي الإجراءات وكانت خلصت كل حاجة ومنتظرة ميعاد الطائرة، أدتها شوية تعليمات وبلغتني أنها هتكون علي تواصل دايم معايا خلال اليوم، طيارتها وصلت وكان لازم تسيبني وتمشي، من وقت وفاة والدي ووداعي ليه علي فراش الموت وأنا بكره الوداع، بكره الدموع المحبوسة، بتتعبني زحمة الكلمات الساكتة جوايا مش عارف هينفع أخرج منهم أيه وهلحق أقول أيه...بس أنا كنت حاسس أنها هتوحشني...أيوه أنا حسيت كده بجد، كنت حاسس أني عايز أقولها كده بس ما ينفعش، استجمعت نفسي وقتلتها:

-سلسبيل...أنا لما جاوبتك علي سؤالك أمبارح كانت إجابتي ناقصة...

بصتلي ونظرتها بتتساءل، كملت:

-مش بساعدك علشان شغلي بس...أنا بعمل كده علشان أنا حابب أعمل كده، أنتي أضافتي ليا طاقة، وحماس في حياتي ماعشتهمش وحببت أغامر لأول مرة في حياتي من أجل شخص يستاهل..شخص مُجتهد، شخص خلاني أوْمَن أن المُستحيل اسمه صعب في حياة الناس اللي بتجازف وتسعي...متخافيش أنا موجود، حتى لو مش بضيف ليكي شيء لأنك قوية بس أنا موجود...توصلي بالسلامة وتحققي حلمنا.

سابت كل الكلام الحلو اللي قعدت ساعة اجمعه ومسكتلي في آخر كلمة، لو كانت عايزة تشلني ماكانتش هتسأل كده، قالت:

-حلمنا!!!

طبعاً بجانب أني ارتبكت وماكنتش عارف أرد كنت عايز أساوي وشها
بالسيراميك اللي واقفين عليه بس تماكنت نفسي في النهاية وقتلتها:

-حلمك بأنك توصلي للمكانة اللي بتتمنيها...وحلمي بأن الصفقة دي
نرجعها تاني.

ابتسمت وسحبت شنطتها وقالت وهي ماشية:

-بالمناسبة الفراولة دي شكر مني علي اهتمامك بشغلك أوي زيي..أشوف
وشك بخير..

مشيت وأنا تابعتها بنظرتي علشان تختفي من قدام عينيا واشرب شوية من
العصير وأفكر جملتها اللي خلتنني بلف حوالين نفسي، هي تقصد أيه
بالكلام ده!

(- بالمناسبة الفراولة دي شكر مني علي اهتمامك بشغلك أوي
زيي..أشوف وشك بخير..)

أفكرت الجملة اللي في الكشكول، وتوقيتها... ، (لا تحاول أن تأتي بما لا
يأتي لأنك فقط شعرت بأنه آتٍ لوهلة...فإن أراد أن يأتي فسيأتي رغماً عن
أنفه!)...افتكرت ردي علي سؤالها قبل ما تسيبني وتكتب الجملة دي(-ده
شغلي، مش لواحدك اللي بتحبي شغلك وبتعملي علشان مصلحة
الشغل...)...وافكرت جملتها الأخيرة بعد إجابتي اللي لسه برضه ناقصها
شوية علشان تبقي كاملة (- بالمناسبة الفراولة دي شكر مني علي اهتمامك
بشغلك أوي زيي..أشوف وشك بخير..)

تايه، مشتت، مش فاهم الربط اللي بحاول أربطه للجمل ده صح ولا غلط؟
روحت ركبت عربيتي وقبل ما أروح الشغل كان لازم أروح مكان ثاني
الأول...

5

في أشخاص بعدهم عننا ممكن يألم، لأننا مابقناش نعرف نشوفهم ثاني،
نلمسهم.. نضمن من ضحكتهم، هنفقد حاجات كتير أوي بفراقهم، لكن مش
هنفقدهم، هيفضلوا برضه موجودين جوانا وعايشين بروحهم اللي
ملازمانا، هنفضل نتعامل علي أساس أنهم عايشين وسطينا ونتكلم عنهم
علي أنهم أحياء... لأنهم أهدونا طول حياتهم اللي يخليهم عايشين معنا حتى
بعد الممات...

زي علاقتي بوالدي الله يرحمه، آه والدي أتوفي من سنتين بس أنا لسه
بتعامل علي أنه معايا للدرجة اللي خلت كل اللي حواليا بيتعاملوا علي
الأساس ده، يمكن بتخفق لما القرايب، والصحاب يفضلوا يزنوا عليا في
موضوع الجواز ده، بس أكثر جملة بتفرحني... فرح مامتك وبياك بيك،
بحس أنهم شايفينه زيي، حاسين وجوده زيي، عارفين أنه بيسمعلي دايماً
لما بكون محتاج أتكلم... لذلك وقت ما اتشتت ومابقتش عارف أفكر
وحسيت أني محتاج أتناقش مع حد، ركبت عربيتي وخرجت من المطار
جري علي هناك، أول ما وصلت قرأت ليه الفاتحة ودعيتله، وبعدين قعدت
تحت الشجرة اللي كانا بنقعد تحتها أنا وهو لما كنا بنروح نزور جدي،

بدأت أتكلم معاه بصوت عالي، عارف أنه مش هيرد عليا بس هو سامعني
وحابب يسمعني:

-كنت قعدت معايا في يوم وسألتني وإحنا في البلكونة وقتلي، أنت ليه مش
عايز تتجوز يا طارق؟ في حد في دماغك طيب؟ ولا كان في ومشيت؟

ساعتها أنا قتلتك أن كان نفسي يكون في وتمشي، كان نفسي أجرب الحب
اللي بيهز كيان النبي آدم ده، عايز أحس زي البشر مش مجرد إعجاب،
عايز أحس إني مخطوف وأني بعمل حاجة علشان حد مشاعري محركاني
تجاهه مش طول الوقت تفكيري اللي بيتعامل.. وللأسف مش عارف
وطول ما أنا مش عارف مش هجازف...

ساعتها أنت ضحكت جامد وقتلي جملة أنا ماصدقتهاش...قتلي أني
هجر، لما هبطل أحاول هيجي فجأة وهلاقيني بسرعة جداً بدون وعي
مني أتخطفت...

بابا أنت كنت صح، هو بيجي بسرعة وفجأة...أنا أتخطفت!!

أنا عارف أن اللي بعمله جنان، بس ما صدقت أني أعيش الإحساس ده،
تقريباً مش عارف أفكر ومشاعري بس اللي بتتحرك...

تليفوني رن بصيت لقيت ماهر زميلي بيرن، رديت عليه من غير مقدمات
لقيبته بيندفع فيا ويقولني:

-أنت فين يا عم أنت، أستاذ معتز قالب الدنيا عليك؟

أدركت فوراً أنه عرف تصرفي أنا وسلسبيل وأنا اللي هتحاسب علي ده،
سألت ماهر عن الأوضاع في الشركة وبلغني أنه أول ما وصل الشركة

دخل علي مكتبي يدور عليا ملاقائيش، فضل يزعق ويقولهم يوصلولي،
وكل ما يرنوا يلاقوا تليفوني مشغول

قفلت معاه وقتله أني جاي الشركة حالاً، ركبت عربيتي وطول ما أنا في
الطريق بحاول استعد للي هقابه هناك من غضب، أول ما وصلت كنت
متأخر جداً عن ميعادي، حاولت ما اظهرش قدامه بس مافيش حاجة في
الشركة تخفي عنه

مجرد ما دخلت مكتبي وقعدت علي الكرسي لقيته بيفتح الباب ويدخل
وعينه بتقول أنه ناوي يعمل مني غدا لكلاب الحراسة.. تماكنت أعصابي
قدامه و ببرود قتلته وأنا لسه قاعد علي كرسي مكتبي:

-أستاذنا...أفضل، منور المكتب والله..

دخل وجه لحد مكتبي سند بكفوفه علي المكتب قدامي وقرب وشه مني
وقالي وهو بيضغط علي سنانه:

-أنت بتعاندي يا طارق وده مش كويس ليك، أنا اللي شغلتك هنا واعتبرتك
أبني وأنا اللي همشيك برضه من هنا وأنت بتتمني أنك ماكنتش تقف
قصادي في يوم، قويت جاد عليا وماعملتليش اعتبار...أنا مش هخرجك
من الشركة دي وحد عاملك اعتبار أنت وأم ملاية لف اللي عايز تتجوزها
دي..

غاظني جداً بكلامه عنها بس أنا مش هنوله اللي في باله وأتعصب،
ابتسمت بسخرية وقربت وشي منه وقتله:

لما حطتني في تحدي ماكنتش عارف أني هعمل كل حاجة وأي حاجة
علشان أكسبه ومش هعمل اعتبار لحد يبقي دي مشكلتك أنت مش مشكلتي

رجعت بضهري لورا وقتلته:

- أنت دلوقتي مش مدير وأنا مدير، إحنا في تحدي ولكل واحد فينا لخسارته أو مكسبه شروط...واللي هيحط كل واحد فينا علي خط النهاية اللي يستحقها، هو سلسبيل...فأنا مستني، وأنت هتستني وهنشوف مين اللي هيتعمله اعتبار في الشركة ومين لا...

خرج من عندي بعد ما كسرلي قلبي اللي قدامي ورماه علي الأرض، مش عارف ده كان غضب ولا تهديد بس أياً كان إحنا داخلين علي أيام سوده محتاجة أولميت وجبنه بطماطم وبطيخ جداً...فكان لازم أفطر قبل ما أعمل أي حاجة، سببت الشغل ما هو كده كده خربان وروحت كافتيرية جنب الشركة طلبت فطاري وقعدت حاولت ارن علي سلسبيل أكثر من مرة ولسه تليفونها مقفول، أول ما الأكل أتخط قدامي افكرت ضحككتها علي وعلي تهيسي الصبح لما صحتني ابتسمت باشتياق...سببت تليفوني علي التراييزة وقعدت فطرت وأنا تفكيرى معاها...في ألمانيا، عدي الوقت من بعد فطاري وطلعت مكتبي حاولت اصب تركيزي علي الشغل بس بالي مشغول معاها، الوقت بيتأخر وهي مافيش عنها خبر، قلقت جداً مستحيل تكون كل الساعات دي وماوصلتنيش، أتصل بيا أستاذ جاد قبل نص ساعة من انتهاء ميعاد الشغل يسألني عن اللي تم، ماكنش عندي رد، أنا حتى مش عارف لحد دلوقتي هي فين؟

قتلته لسه مش عارف بس أول ما يكون في أخبار هبلغه، قفلنا وحاولت أرن عليها تاني برضه تليفونها مغلق، القلق بدأ يزيد لدرجة خوف وتفكير في ياترا حصلها أيه؟

قفلت الشغل ونزلت أول ما بصيت لعربيتي الE36 لوهلة كنت حاسس أني هشوفها واقفة قدامها فبصيت ليها بلهفة، لكنها ماكانتتش قدامها وكانت العربية مكانها في ثبات تام مافيش حواليتها روح...ركبت وجريت بأقصى

سرعتي في الشوارع وعلي الكباري عايز أهدى الإحساس بالخوف اللي
متملكني مش عارف، كان المفروض تتصل من ساعات كتير تقولي أنها
وصلت حتى الميعاد اللي حجزناه معاهم أمبارح فات، هي بقي فين!؟

نزلت من العربية طلعت شقتي حتى ما قدرتش أعدي علي والدتي وأختي
أسلم عليهم من كتر ما أنا غضبان ومتوتر، غيرت هدومي ودخلت عملتلي
نيسكافيه وقعدت في البلكونة بفكر، علشان يقطع تفكيرني تليفوني وهو
بيرن... بصيت لقيتها هي، كل حاجة باهتة نورت وقلبي اللي كان نبضه
تقيل طول اليوم بقيت مش عارف أخذ نفسي من سرعة نبضه، رديت:

-أنتي فين؟ أنتي كويسة؟

بصوت حماسي:

wir haben es geschafft, sir -

قمت وقفت من مكاني وضحكت وسألتها وأنا مش مصدق اللي سامعه:

-بتكلمي جد؟ أنتي عملتيها؟ انكلمتي معاهم؟

ضحكت وقالتلي بثقة:

- ما كنتش عايزة أتكلم مع حضرتك إلا لما أكون نجحت في المهمة، بعذر
عن عدم الرد علي كل المكالمات دي...أنا وصلت حتى ما دخلتش غرفة
الفندق، رocht حظيت شنطتي في الريسبشن يطلعوها الغرفة وجريت
علي العنوان وفضلت مستنية ميعادي، أتقابلت معاهم وتكلمت معاهم

والحقيقة كنت خلاص يئست لولا أنهم طلعا مش عارفين أزاى بناكل
صوابع زينب! وأم علي؟ فكرونا زومبي تقريباً... فغيرنا العزومة
وهنخليها صوابع زينب وأم علي بعد بكره في الحسين..

أنا يومها ما كنتش عارف أفرح بيها ولا ليها ولا في معنز ولا لجاد... أنا
كنت سعيد أوي ومش عارف أعبر ليها عن سعادتني، فضلت مبتسم وأنا
بسمعها وضحكت علي روحها الحلوة والحيل بتاعتها اللي ما بتخلصش،
قاتلها:

-أنتي جميلة أوي يا سلسبيل... أنتي تستحقي كل حاجة حلوة زيك، لأول
مرة أفرح بأن ثقتي كانت في محلها بالشكل ده... أنتي عظيمة جداً وهيكون
ليكي مستقبل باهر..

حسيت بخجلها اللي خارج من هدوء صوتها الغير معتاد، ابتسمت وأنا
مستنيها ترد وهي ساكتة لحد ما طلعت منها شكراً لحضرتك
بالعافية... قاتلها:

-طيب علشان نبقي متفقين، حضرتك دي بتنتقل في الشركة... برا الشركة
إحنا شركاء نجاح فأنا أسمى طارق.. متفقين؟

قالت حاضر وياريتها ماقاتلها، لو كانت قالت بحبك أهون، عملت نفسي
مش سامع علشان اسمعها بالرقعة دي تاني:

-بتقولي إيه ماسمعتش؟

--حاضررر...

كتمت ضحكتي وسألتها:

-أنتي فين دلوقتي؟ وأيه هيتم؟

--هتمشي شوية في شوارع ألمانيا وطيارتي هتكون علي بليل هروح أخذ
شنطتي من الغرفة بعد ما أغير هدومي وامشي

-طيب ماشي وأنا شوية هتصل اطمن عليك لبتكوني توهتي وتلبسيني
مصيبة

ضحكت وأنا ابتسمت وأنا بسند ضهري علي سور البلكونة وبكفي الشمال
برجع شعري لورا، قالتلي بمرح:

-يعني لو توهت هتيجي تنده عليا في الجوامع زي ما بيعملوا في الريف؟

رديت برد ما استوعبتهوش إلا لما سكتت فجأة ومش عارف جبت التلقائية
اللي تودي في داهية دي منين؟...بس أنا كنت صادق:

-لو تطلب الأمر أقلب كل صخرة في ألمانيا وأدور عليك تحتها هعمل
كده...

من سكوتها انا ارتبكت، لقيتها بتقفل في المكالمة وبتهرب واتحججت بأنها
هتقفل علشان تلحق تلف شوية، قفلنا المكالمة وأنا بصيت لكوباية النسكافية
وكلمتها زي ما بعمل معاك كده...أيوا انا عارف لما الرجالة بيكبروا
بيتهطلوا..بصتلها وهي ع السور جنبي وقتلتها:

-تفكرى معتر هببى منظره أبه دلوقتى؟

طبعا ما ردتش علشان كوباية نيسكافيه، المهم أنى لبست بسرعة ونزلت معرض سيارات أشوف الأسعار، وقبل ما أوصل كنت مبلغ أستاذ جاد باللى تم وفرح بيا جداً ووعدنى بمكافئة وده زاد حماسى إنى أروح أشوف أسعار الbm على طول...لقت لفة لذيدة من لفاتى اللى بحبها واختارت حاجة حلوة أعلى من الE36، روت البيت وأنا مرضى وسعيد...يوم ملىء بالرضى...ببص فى الساعة لما رجعت لقتها 12.30 بعد نص الليل حسيت أنى غبى أزاي ما اتصلت ببيها؟ رنيت عليها لقت التليفون مغلق فهمت وقتها أنها ركبت الطائرة...زعلت من نفسى جداً، فتحت وأتساب ابعثها رسالة اعتذار لقتها بعثالى تفاصيل المقابلة وميعاد وصول طيارتها وميعاد وصول الوفد مصر تانى يوم، وشوية صور لكذا منظر عجبوها فى رحلتها، كنت مبتسم طول ما أنا بتفرج على تفاصيلها اللى بتشاركنى ببيها، مش عارف نمت أزاي مكانى وأمتى؟ بس كنت مرهق جداً فكان طبيعى أنام، صحيت...

أزاي مغلق والمفروض تكون وصلت من بدرى؟

روحت الشركة والكل بيستقبلونى بالترحاب، نسونى القريفة اللى كنت فيها وماشى وسط الشركة بثقة وفخر ومنتظر أشوف خذلان معتر أبو كرش اللى أول ما دخلت عند أستاذ جاد مكتبه لقيته عنده، استقبلنى بنظرة غضب كنت مستنيها وعارف أنها جاية بس ما اهتمتتش، روت وسلمت على أستاذ جاد اللى أول ما شافنى قام وأخذنى بالحضن وشكرنى على إصرارى أنى أنقذ الوضع، كل ده وأستاذ معتر قاعد وباصص عليا بقرف وغضب، بصيته بابتسامة وأنا بقعد على الكرسي اللى قدامه وافرد ضهرى على الكرسي براحة، قلته:

-أزيك يا أستاذ معتر...أتمني تكون نفسيتك بخير، خلاص الصفقة اللي كنت خايف تضيع رجعتك...فاضل بس أستاذة سلسبيل ترجع وتشكرنا في نفس ساحة الشركة اللي أتحدثنا فيها..وكمان تتعامل كأب وتخطبلي في نفس الساحة علشان تبقي نفسيتك مرتاحة أكثر..ولا أيه!

ضحك بسخرية وبصلي بخبث قلقتني، ورد ببرود:

-لما ترجع بقي...

قام وقف وقبل ما يخرج من الباب قالي

- أنا في مكتبي ومستني أول ما ترجع أنا مستعد...

خرج ونبرته ماريحتنيش حاسس أنه هيقول حاجة قدام الكل تضايقنا، وعلي الأخص سلسبيل..بس انا جاهز لأي حاجة وهقف مع سلسبيل مهما كان التمن..

بلغت أستاذ جاد بالتفاصيل اللي سلسبيل بعتهها وسيبته يظبط الإجراءات والتجهيزات وروحت علي مكتبي أخلص شغلي، من وقت للتاني برن عليها برضه مغلق، اليوم كله ماظهرتش فيه ومش فاهم في إيه؟

روحت البيت وأنا هتجنن، ميعاد الوفد جه وهي لسه ماجتش!

ماعرفتش أنام يومها لحد ما تليفونها أتفتح، وجالي مسدج أنه أتفتح..جريت رنيت والرنة ماكملتش وانتقل تاني، كل الاحتمالات جت في دماغي وفضلت قاعد مستني أي خبر منها لحد ميعاد الشغل، لبست بدلتني وشربت قهوة سادة علشان أفوق وروحت الشركة وأنا مش طابق حد، استقبلني ماهر بلامح حزينة قلبي أتقبض وأنا مش فاهم ليه؟

- في أيه يا ماهر؟

بصلي ومش عارف يتكلم وبعدين لقيته بيقولي:
-سلسبيل في المستشفى..

6

حسيت بنار مسكت فيا أول ما سمعت الجملة، وكان في سكين شفاف
أتعرز جوا قلبي فجأة، سألته بذعر:

-أنت بتقول أيه؟ أيه حصل وعرفت منين الكلام ده؟

ماهر استغرب رد فعلي المُبالغ فيه بالنسبة لوجهة نظره، وحاول يهديني:

-اهدي يا طارق هفهمك، والدها اتصل واعتذر عن إنها مش هتقدر تيجي
لاستقبال الوفد؛ لأنها في المستشفى حاصلها حادث سير أمبارح وهي
راجعة من السفر..

-حادث سير!!!؟

افتكرت كلام معتز ومن غير ولا كلمة زيادة طلعت ليه مكتبه وأنا كلي غل
وغضب، من غير ما اخبط دخلت، كان بيتكلم في التليفون وبيضحك أول
ما شاف منظري والغضب اللي فيا أترعب وقفل التليفون وبيسألني في أيه؟

مالحقش يعمل أي حاجة لأنني قيدت رقابته بأيدي وأنا مش داري بعمل أيه!
بكل الغل اللي جوايا زعقت فيه:

-ورحمة أبويا يا معتز لو عرفت أن أنت اللي عملت فيها كده ما هسيبك إلا
أما تسلملي علي أبويا من غير ما يلاقوك جثة يترحموا عليها..

دخل ماهر وكذا حد من الموظفين يحاولوا يخلصوه من أيدي، سييته وهو
مش قادر ياخذ نفسه وبيتكلم بالعافية:

-أنت شكلك أتجننت، هسجناك يا طارق.. هسجناك علي اللي بتعمله ده.

حاولت أروح أضربه لكنهم منعوني، قاتله قبل ما اسويه وأخرج من المكتب
وماهر يجي ورايا وهو في ذهول من اللي بعمله:

-وأنا مش هسجناك... أنا هقتلك... وسلسبيل هترجع وما ابقاش أنا إلا لما
أخلي سلسبيل تبقي مكانك في يوم من الأيام..

خرجت وروحت علي مكتبي قلعت الجاكت، وشمرت أكمام القميص،
وفضلت رايح جاي في المكتب بعصبية، قلبي مرعوب عايز أهدي الأول
علشان أعرف أروح ليها ولا أفهم هعمل أيه؟ بس كل اللي متمكني في
الوقت ده أقتل معتز الأول، دخل ماهر عليا وقفل الباب وراه وسألني:

-أيه اللي أنت عملته ده يا طارق؟ أنت أتجننت؟

--لا انا ما اتجننتش، هو قالها أمبارح (لما ترجع بقي...) هو كان ناويها، هو اللي خطط لأذيتها وديني لو طلع هو السبب ما هرحمه..

حاول يهديني، كنت عايز امشي وأروح المستشفى اللي هي فيها لكن أستاذ جاد ما سابنيش، وصمم إن انا اللي استقبل الوفد معاهم بدل سلسبيل، وأروح معاهم الحسين، بعد ضغط منهم وافقت، في الوقت اللي سلسبيل فيه بنتألم وبتتوجع ومش حاسة بالدنيا، هما قاعدين بيضحكوا وبيكسبوا مبالغ بسببها، في الوقت اللي هي في دنيا تانية لوحدها محبوسة جوا اللاوعي السلبي من اللي شافته في الحادث، قاعدين بياكلوا ويشربوا ويتصوروا بعد ما مضوا العقد وأنا واقف كل دقيقة بتعدي عليا بتقطع في قلبي بالبطيء، مش قادر ابتسم، مش عارف أفكر، مش قادر انتظر أكثر...عايز أشوفها، اطمن عليها.واللي زاد الوقت صعوبة وجود معتز فيه، ونظرات الشر والوعيد اللي بنرسلها لبعض

بصعوبة قدرت استأذن منهم وركبت عربيتي وفورا عرفت المستشفى من ماهر وجريت علي هناك، طلعت الغرفة بعد ما عرفت رقمها من الاستقبال لقيت قدام الباب راجل خمسيني وقور بلحية خفيفة تدمج بين الشعر الأبيض والأسود، وعلي ملامحه حزن وآسي واضحين لابس تريننج رياضي، وست أربيعينية بحجاب قصير بسيط، وبنطلون واسع عليه شميز طويل واسع قاعدة بتبكي، اتفاجئت جداً لأنني كنت متوقع أن الأم نفس استايل البنت، افكرت كلامها لما قالت أنها كانت بتلبس بناطيل وطرح قصيرة عادي وهي اللي اختارت خمارها، رغم إن البيئة المحيطة بيها تساعدها تكمل في لبسها الطبيعي إلا إنها اختارت الطاعة والراحة الأكبر..أزداد فخري بيها أكثر لما تأكدت أنهم والداها، سلمت عليهم وعرفتهم بنفسي وسألتهم عن اللي حصل قالوا إنها كانت راكبة تاكسي وعربية كانت جاية قدامهم بسرعة ومشغلة كشاف عالي، فالسواق ماشفش حاجة فاتقلبت العربية بيهم، السواق قدر يخرج من العربية وفيه شوية كدمات، لكن هي العربية أتقلبت بيها أكثر من مرة والإسعاف جابت الاثنين علي هنا وكلمونا نيجي...

كنت بسمع منهم ومش مرتاح للتفاصيل وتعيني بس مجرد تخيل اللي حصلها، سلسبيل كانت قايلالي هتطلب أوبر وتبعثلي اللوكيشن ولوالدها، ليه ركبت تاكسي؟

استأذنتهم أدخل أطمئن عليها، وبالفعل دخلت... من بعد موت والدي ماكنش عندي إحساس الخوف علي حد، ماكنتش بعرف أخاف أوي... أزعل أوي... أتعب أوي، ليفل الأوي ده زال من عندي، كنت شخص ما عندهوش حاجة تحرك مشاعر الحزن علي حد بالشكل اللي حصلي أول ما شوفتها نائمة فيه متجيسة، ومجروحة من مناطق كثير ومضمة ومش حاسة بوجود حد، مش هنكر أنا كنت كاتم البكاء بصعوبة، أنا مش ضعيف بس أنا بقالي كثير مستنيها، ماكنش ينفع أشوفها بتضيع مني وما اتألمش، بقيت واقف قدامها وعمال أحاول أتخيل هي عانت من أيه في وقت الحادثة؟ ولا بعده! ولا هتعاني من أيه بعد ما تفوق؟ وبتعاني من آلام شكلها أيه دلوقتي؟ مابقتش قادر...

يومها مشيت من المستشفى ماعرفتش أروح البيت، فضلت في عربيتي لحد الفجر قاعد علي الكورنيش بيها بفكر... زحمة تخيلات وأفكار وأحاسيس، دموع ماعرفتش طريق عينيا من كثير أوي زارتنني في اليوم ده، كنت غضبان جداً، شعوري بيقولي إن معترز ليه يد في الحادثة دي، بس كان كل اللي هاممني أنها تفوق واطمن إنها بخير

روحت البيت مش شايف قدامي، غيرت هدومي وأخذت شاور وروحت الشغل لقيتهم بيمنعوني أدخل، مابقتش فاهم حاجة، أتعصبت وزعقت مع الأمن لحد ما فهمت أنهم واخدين أوامر من معترز بأنهم مايدخلونيش وبيقولوا أني مرفود!!

كنت هتجنن، اتصلت بأستاذ جاد وبلغته باللي حصل، شدينا مع بعض وتجادلنا لأنه بيغلطني بسبب أسلوبني مع معترز، فهمته اللي حصل وشكي

وهو دافع عنه وده المتوقع، في الآخر قالي اخدلي أجازة يومين أقعد في البيت لحد ما الأمور تهدي وأكلمه وهو هيرجعني تاني ويصالحنا علي بعض...يصالح مين علي بعض؟ أنا هقتله.

قفلت معاه وأنا ما عنديش طاقة للجدال وروحت شربت قهوة في الكافيه وأنا بتفرج علي الصور اللي كانت بعناهاالي سلسبيل وحاسس إنني مربوط من رقابتي، مخنوق ومتكتف مش عارف أتصرف، محتاجها تصحي، محتاج أحس إن كل حاجة حلوة وعفوية زي ما حسيت بوجودها في الكام يوم اللي فاتوا، في نفس اليوم بليل روحت زورتها كانت فاقت، كنت فرحان أوي لما شوفتها بتتكلم، تعبانة وكلامها هلكان لكن المهم أنها موجودة، كنت عارف إنها قوية وهتفوق بسرعة وتتحسن، بس كنت كاره نظرة الاستنجد اللي في عينيها اللي أنا مش فاهم سببها، كانت عينيها بتهرب مني علشان ماتقوليش ألحقني، أنا مش مجنون وبتوهم بس أنا فعلاً حسيت ده في عينيها، الوقت ماكنش يسمح أي حديث، سيبتها ومشيت بعد دقائق بسيطة من أني أشوفها وأطمئن عليها...

يومين بروح ليها اطمئن عليها وأمشي من غير ما اسألها عن اللي تم، يومين بروح اسأل الدكاترة عاملة أيه وأتكلم مع والدها شوية وعيوننا بتتكلم بالنظرات أنا وهي واسيبها وأمشي وجوايا مش مرتاح، جوايا زعلان، فيا خوف عليها غريب، أنا مش قادر أفهم هو أنا كده بحبها فعلاً؟ بس أزاي هيكون ده حب من كام يوم بس؟ مابقتش فاهم أي حاجة...

في اليوم التالت روحت بدري المستشفى وكان اليوم اللي هرجع فيه الشركة حسب اتفاقي مع أستاذ جاد لكني خالفت الاتفاق وماروحتش، قررت أزورها بدري وأتكلم معاها لوحدها وأسمع منها تفاصيل الحادثة، بس كنت بالفعل متأخر وكان فيه اللي لحق يسمع قبل مني..لقيت الضابط خارج من عندها وبيتكلم مع والدها قدام الباب وبيقوله:

-بإذن الله بنت حضرتك تقوم بالسلامة، والحمد لله أنها خرجت من حادثة زي دي و هتخرج من المستشفى كمان النهارده..ربنا كتبلها عمر جديد هي والسواق...كده هنقل المحضر بعد ما أخذنا أقوالها وتأكدنا إنه مجرد حادث سير عادي...وبإذن الله تقوم بالسلامة بأسرع وقت.

نقل المحضر!! أزي نقل المحضر وأزي حادث سير عادي؟؟

روحت وسلمت عليهم والضابط بعد ما أتعرف عليا سمعت منه وقال إن الإجراءات كلها سليمة وهيقفلوا المحضر بعد ما اخدوا أقوالها، شكرته علي مجهوده وطلبت من والد سلسبيل ادخل اتطمئن عليها، دخلت وسبيتهم برا يتناقشوا لقيتها قاعدة بتبكي قلبي أنا اللي كان ببيكي معاها...صحيح بيقولوا إن القوي زي الجبل دموعه ثقيلة زي الحجارة..بس ماتوقعتش مدي قوة تأثيرها عليا بالشكل ده، كانت قاعدة علي سريرها وماسكة تليفونها المقفول بصباعين بس بسبب الجبس اللي دراعاتها متجبسة بيه ودموعها مابتقفش، صوت عياطها أذاني، مش قادر أتحملة أكثر...

-سلسبيل...

أول ما شافتني حاولت تمسح دموعها مش عارفة تحرك أيديها والجبس مش مساعدها، زاد بكاءها وهي بتطلب مني أخرج لكني ماوافققتش، فهمت أنها حست بالضعف والعجز وده ألمها أكثر بس هي مش فاهمة أنه بيوجعني أنا أكثر...دخلت وقعدت قدام السرير بتاعها وطلعت منديل علشان أمسحها دموعها، حاولت تبعد وشها عن أيدي أكثر من مرة لكني أصريت وأنا مُتحفظ كويس علشان ما المسهاتش، قتلها:

-سلسبيل اسمحيلي بالله عليك، ولو لمرة بس أحس أني مش غريب عنك...أنا عارف أني فعلاً غريب...وبقيت غريب أكثر لما أنتي بعدتي..بس أنا محتاج أسمعك، محتاج اهديكي..مش أنتي بس اللي محتاجة حد يكون معاكي..

بصوت بيعافر علشان يقاوم الإنهيار والضعف:

-انا مش محتاجة حد، انا بعرف اسند نفسي كويس..

--انا محتاجك تسنديني بسندك لنفسك...

بصتلي باستغراب ودموعها علي خدها، صمت مر ما بينا نظرتنا قالت فيه
كلام كثير..وتحديداً نظرتي اللي كانت بتوصلها كلام بيوصلني عنه
علامات استفهام من نظرتها..لقيتني تلقائي بقرب أيدي بالمنديل من وشها
وبمسح دموعها وهي ساكنة..كانت اسعد لحظات حياتي كأنها بتعيط كب
كيك مش دموع مثلاً!

-اطمني..أنا عارف أنك قوية، بس كلنا بشر...لينا لحظات حقنا فيها نحزن
ونعيط وندغدغ الدنيا، وحقنا نلاقي الحد اللي يسمعنا ويطمنا ويحسسنا أنه
فاهمنا وحاسس بينا ومعانا...

بصتلها جامد وهي بنتنهد وسألتها:

-سلسبيل هو أيه اللي حصل في الحادثة؟ ليه ركبتني تاكسي رغم أنك قلتيلي
هتركبي أوبر وتبعتلنا اللوكيشن؟

نظرتها هربت مني وغمضت جفونها الوارمة جامد، وغابت عني بصمتها
لثواني ورجعت بصتلي وحكتلي كأنها بتسترجع السيناريو في دماغها

-طلبت أوبر وأقرب واحد كان قدامه وقت طويل وكان الوقت متأخر
ولازم أروح البيت، ووالدي كان مسافر محافظة تانية في شغل تبع النادي
اللي شغال مدرب كراتيه فيه، مكانش هيعرف يجي ياخدني وتليفوني كان
بيفصل اضطريت أخذ تاكسي...وبعدين...

سكتت وبصت لتليفونها ثانية ورجعت بصتلي وقالتلي وأول مرة تبص في
عيني جامد وترتني، سألتها بارتباك وقلق:

-وبعدين أيه يا سلسبيل كلمي!

--قلت للسواق العنوان و إحنا في الطريق أنا نمت وصحيت علي ضوء
قوي مالحقتش افهم حاجة غير إن إحنا بنبعد عن الضوء مرة واحدة،
والسواق بيفتح الباب ينط وأنا العربية بتجري بيا وتتقلب ومابفتكرش أي
حاجة تانية وبفوق في المستشفى..

ماكنتش مطمئن لكلامها بس سلسبيل شخصية مايتكذبش، وليه هتكذب
أصلاً حسيت أنني زودتها مع معتز وإني فعلاً غلطت، كل ده ماشغلنيش
وقتها قد ما شغلني إحساسها وكل اللي مرت بيه، كنت حابب أفرحها علي
الأقل فقلتلها:

-الحمد لله أنك خرجتي منها بخير...أينعم مش عارفينلك ملامح بس أهو
خرجتي منها علي الأقل

ضحكت وكلمت كلامي:

-أعتقد مش هتقدري تنسي الفترة دي من حياتك وهتحكي لأولادك عنها،
عن أزاى جازفتي علشان تعملي حاجة صح ورغم أنك أتأذيتي بسببها بس
نجحتي وبجدارة وأثبتتي للجميع أنك قد الثقة وأقوي وأذكي مننا كلنا..

سألت بلهفة:

-مضوا العقد؟

ابتسمت وحركت دماغي بالموافقة وقتلتها:

-طبعاً يا حضرة الموظف المثالي، أنتي خلاص بقيتي دراعي اليمين في
الشركة وهفتخر بيكي قدامهم كلهم وبالذات أستاذ كرش معتز..

كنت متوقع تضحك ولكنها ابتسمت وسرحت وده خلاني سألت:

-سلسبيل في أيه مخبياه؟

--أنا! لا مش مخبية حاجة..أنا بس ز علانة إني لما حققت حاجة كبيرة من
اللي أنا عايزاه وخلاص هتعين في الشركة، مش هقدر أعمل ده دلوقتي
بسبب حالتي الصحية، مش هيبقي قبل 3 شهور مثلاً

قبل ما نكمل كلامنا سمعت دوشة جاية من بره ولقيت كذا حد من الشركة
بيخبطوا وداخلين ومعاهم ماهر، سلمت عليهم وكل حد فيهم سلمها هديته
وقعدوا يهزروا ويضحكوا معاها وكنت سعيد بأنها قدرت تتجاوب معاها،
وأخرجت جداً لما ماهر أتكلم وسط الهزار وقالها:

-شكلك أنتي اللي هتستلمي مكان طارق الشغل وهتبقي المدير الجديد بعد
ما معتر منع دخوله الشركة تاني

بصتلي بصدمة وبصيت أنا لماهر بلوم، قالي بعد ما أدرك اللي عمله:

-أيه ده انا ماكنتش أعرف أن ما عندهاش خلفية..

أتكلمت وسام واحدة من الموظفين في الشركة وقالت:

-كان طبيعي أستاذ معتر يعمل كده بعد ما أستاذ طارق كان هيموته وأهانه
قدامنا، كان لازم يحاول يرجع برستيجه اللي ضاع تاني...بس أحسن
يستاهل أصلاً ما حدش بيطيقة..

كانت بتسمع ليهم ومصدومة وبصتلي وسألت:

-ليه يا طارق؟

بصتلها بخجل وحزن:

-لما عرفت أن حصلك حادثة فكرت هو السبب غضبت وماشوفتش قدامي،
مسكت فيه وهزقته وهددته إن لو طلع هو السبب هقتله..

بصتلي بصة عمري ما هنساها، بصة حيرتني، عينيها لمع فيها دموع،
حسيتها خيفة ومطمنة، بتشكرني وبتترجاني، بتتكلم وبتمنع صوتها عني!!
تناقض خلاني سيبتهم ومشيت..

كلمت أستاذ جاد واتقابلنا في الفرع التاني للشركة بعد ما طلب مني أروح
ليه ضروري، أتكلما واتفقنا أني هروح واعتذر لأستاذ معتر، كان

الموضوع ده ثقيل علي قلبي أوي بس كان لازم أعمله، روح البيت وأنا
بفكر أزاى هعمل ده؟ وهقوله أيه؟

طلبت عنوان بيته من حد في الشركة وأخذت ورد وشوكولاتة ولبست
كاجول وروحته، وكنت خايف من الطريقة اللي هيقابلني بيها بس ماحدث
بلغني قبلها إن معتز بيعحب الصيد وعنده بندقية ممكن يفكر يصطاد بيها
بني آدمين عادي!

7

اللي حصل يا سيدي إني استنيتته في جنينة الثيلا بعد ما الأمن دخلوني
وحد منهم راح يبلغه أني برا، سمعته وهو جاي يزعم والأمن معاه عمال
يقولهم طلعه برا يا هقتله، كان طبيعي أتوقع أنه مجرد كلام بيتقال وقت
غضب، لكن أني ألقية خارجي ببندقية صيد ده اللي ما توقعتهوش أبداً
وخلاي أحاول اهدي جنانه، وأنا الحقيقة عايز أكسر دماغه ومتحمل
بالعافية علشان خاطر ده غلطي ولازم أتحمّل عواقبه، وعلشان ما
يتهورش ويقتلني وقت غضب، وقفت قدامه والأمن بيحاول يخرجني،
قتله:

-أنا جاي مش عشان أي حاجة غير أني أعتذر، أنا غلظت وحقك عليا،
بس أنا بعتبرك والدي بجد وعارف أنك هتعدرنني وهتتفهم غضبي
وخوفي، أنا محتاجك تسمعلي بعيداً عن أي حاجة... اسمعني وبتناقش
بهدوء وبعدين تعمل اللي أنت عايزه.

--اسمعلك وتعتذر وزى والدك؟ هو أنا المفروض تاكل عقلي بالكلمتين
دول وشوية الهبل اللي جايه معاك ده وأسامح! أنت لو ماخرجتش من هنا
حالا هقتلك يلا..

- أنكل معتز أنا عارف انه حقك اللي بتعمله، بس أنا غلطت وجاي اعتذر
وكل إنسان خطأ، وبعدين ما حضرتك غلطت في حق سلسبيل وهي
سامحتك وكمان انقذتلك صفقة بملايين الأرباح وماهمهاش أي حاجة من
اللي حضرتك عملتها معاها، والبنيت بالفعل كانت هتموت بسبب حاجة زي
كده لمجرد إنها عايزة بس تشتغل.. اسمعني بس واتفاهم..

نزل البندقية بعد ما كان موجهها تجاهي، وخلي الأمن يسيبونا وبصلي
وسألني وهو لسه غضبان:

- تموت!! تموت أزاى أيه حصلها يعني؟

حكيتله اللي حصل، وحسيته شرد مني وبعدين قال بسخرية:

- وأنت بقي أتأكدت أي مش أنا اللي عملتها فجيت تصالحي؟

--أنا متأكد من الأول إن مش حضرتك بس كانت لحظة لعب الشيطان في
عقلي وصورلي إن جملتك دي هي اللي ورا اللي حصلها.. ابن من أبناءك
وغلط، هتقتله علشان غلط!

قعدنا واتكلمنا وعدي الموقف بصعوبة وشوية ضحك علي العقول بكلام
مجاملات وتعظيم من اللي بيحبهم، بس طبعاً علشان هو أستاذ معتز فكان
لازم يحطلي شرط اعتذره قدام الشركة كلها زي ما أهانته قدامهم... اتفقنا

ووعدني إنه هيو في بوعده بأنه يطلبلبي سلسبيل للجواز وكمان هيعينها أول
ما تسترد صحتها

مشيت من عنده وأنا مبسوط، أن الأمور بنتظبط بس جوايا شعور بيقولي
إن في حلقة ناقصة في الموضوع بشكل عام وبحاول أتجاهل الإحساس ده،
روحت البيت وأنا مش مصدق أنني عديت من الموقف، الوقت كان لسه
مش متأخر أوي علشان اتراجع عن فكرة أنني اتصل اطمئن علي سلسبيل،
غيرت هدومي وأخذت كوباية عصير فراولة من اللي والدتي أدتهولي وأنا
طالع شقتي، دخلت البلكونة وعلي ضوء القمر وقفت وسندت علي السور
واستنيتها ترد علي مكالمتي، سامع الجرس وشارد في تفاصيل اليوم
ونظرتها، وفجأة سمعت صوتها واصلني من سماعة التليفون نعسان،
ابتسمت وسألتها:

-صحتك من النوم؟

بصوتها الطفولي قالت:

- ولا يهملك يا مدير...ولا أقولك أيه دلوقتي بعد اللي عملته في أستاذ معنز
ده؟

ضحكت وقتلها:

-لا ما تقلقيش أنا اعتذرت ليه علي اللي عملته...بس ده لحد ما اتأكد أن
مش هو اللي عمل كده ولو مش هو أعرف مين اللي ورا الحادثة دي
وأقتله...

سكنت فجأة وأنا مستنيها تتكلم وبشرب من العصير باستغراب لطول فترة
السكوت، سألتها وأنا بقعد علي الكرسي وبحط كوباية العصير قدامي:

-سكتي ليه؟

--طارق هو أنت ليه مصمم أن الحادثة في حد وراها مع أنها حادثة عادية؟ هو في حاجة أنت عارفها وأنا لا؟

ضحكت بقوة وقتلتها بثقة أنا نفسي استغربتها:

-لا في حاجة أنتي عارفاها انا مش عارفها...

سكتت ورجعت سألت بهدوء:

-حاجة أيه؟

اتنهدت جامد وقتلتها:

-سلسبيل في حلقة مفقودة، أنا حاسس ده، نظرتك النهاردة قالتلي كده، طريقتك، الحادثة نفسها فيها حاجة مش منطقية.. توقيت الحادثة.. كل ده فيه حاجة مش مريحاني فأرجوكي لو في حاجة أنتي مخبياها قولي.

--ريح نفسك وماتر هقش تفكيرك يا طارق، ده كان مجرد حادث... أنت بقي متصل علشان تحقق معايا عن الحادثة؟

كنت عارف إنها بتقفل الكلام في الموضوع ما حبتش أضغط عليها أكثر، وقتلتها:

-لا كنت عايز اطمن عليك، عاملة إيه دلوقتي وروحتي البيت ولا لا؟

انتهدت وقالت:

-أه روح، وأنا بخير الحمد لله ماتقلقش..

اتناقشنا شوية عن وقتها في ألمانيا وكنت سعيد بنقاشي معاها، وقفنا...بعد ما وقفنا دخلت علي الواتساب زي عادة كل يوم قبل ما أنام، لاحظت إنها لحد الوقت ده ما قرأتش رسائلي ليها، كنت عارف إنها هتفضل فترة من غير واتساب لأنها مش هتعرف تتعامل مع التليفون لحين إنها تفك الجبس، فقررت أكمل علي المسدجات دي..قررت لما أحتاج أقولها حاجة أو أحتاج أتكلم معاها وماليش المساحة في ده علي الحقيقة، هكلمها في الشات زي ما عملت في الكام يوم اللي فاتوا من اليوم اللي أخفت فيه وهي راجعة من السفر..بعثتها مسدج بعبرلها فيه عن سعادتني بالمكالمة، وعن شعور القلق اللي عندي والخوف عليها، وأني مش هسكت غير لما أتأكد 100% أنه مجرد حادث عادي مش وراه حد...

تاني يوم روحت واستلمت الشغل واعتذرت لأستاذ معتز قدام الكل وأنا مش طايقه ولا طايق حد، وعلشان أتحمّل المشهد ده طلبت قهوة سادة بعد ما طلعت مكتبي، دخلت وسام بالقهوة بدل السكرتيرة فاستغربت، حطيتها علي المكتب وقعدت قدامي فسألته:

-خير يا وسام في حاجة؟

اتحنحت وابتسمت وبعدين قالتلي:

-لا أنا كنت جاية أبارك لحضرتك علي أنك رجعت الشركة تاني

ابتسمت بمجاملة وقتلتها:

-شكراً يا وسام، الله يبارك فيكي

بصتلي وسألتني:

-هي سلسبيل هتيجي تشتغل هنا أمتي؟

بصتلها بشك وقتلتها:

-الحقيقة مش عارف لسه، ظروفها الصحية حالياً ماتسمحش..ليه بتسألني؟

قامت وقفت و قالتلي:

-أنا بسأل بس عادي، أصل حضرتك عارف ماحدثش بيطبق أستاذ معنز
ومستنين نشوفه وهو بينفذ المكافأة بتاعة نتيجة التحدي اللي كسبتوه،
وعايزين نشوفه وهو بيعتذر لسلسبيل...إن شاء الله تقوم بالسلامة وتتعين
علي خير، بعد أذنك .

سابتني وخرجت وتقريباً بدأت أشك في كل اللي حواليا لدرجة إني حطيت
وسام كمان موضع شك! نص ساعة ودخل ماهر عليا بأسلوبه المرح:

-صاحبالي المديبير اللي نورنا ورجع المكتب وبقي شكله فنله وهو
بيعتذر لمعنز بيه قدام الشركاه..

سلمت عليه وأنا بضربه في كتفه بهزار، عارف إنه بيرخم عليا
فماز علتش، لقيته قعد وبيسألني بفضول:

-عملتها أزاوي دي واقتنعت أنه هو اللي مش ورا الحادثة ده أنا نفسي ما
اقتنعتش؟

استغربت وسألت:

-ليه ما اقتنعتش؟

--يعني، إن السواق ينط من العربية ويسيبها من غير ما حتي يحذرها أو يقولها تنط هي كمان!.. وأنه يطلع كويس وهي تطلع بالشكل ده؟ وكمان أزاي الإسعاف ودتهم هما الاتنين المستشفي؟ والسواق خارج سليم قبل ما العربية تتقلب بسلسبيل وهو اللي أتصل بيهم وماراحش حتي ينقذها؟

اسئلته جنتنتي؟ طريقته غريبة وليه بيسأل الاسئلة دي إلا لو كان عارف إجابة ليهم؟ وأزاي عرف التفاصيل دي كلها؟؟ كان لازم أشك فيه هو كمان رغم أنه صاحبي وعشرة سنين، لقيتني بسأله بانفعال:

-أنت عرفت التفاصيل دي أزاي؟ وليه الأسئلة دي بتسألهاالي؟ أنت عارف حاجة يا ماهر ومش عايز تقولها؟

استغرب من طريقتي وأتضايق من نبرة الشك اللي في صوتي واتعصب وقال:

-حاجة ايه اللي أعرفها؟ أنا عارف التفاصيل من والد سلسبيل والاسئلة دي مجرد تحليل مني عادي، أنت هتشك فيا أنا كمان؟ أنت اتجنتت يا طارق شكلك... أنا هروح أشوف شغلي علشان أنت الفترة دي مش طبيعي

هو عنده حق ما هو مش طبيعي اللي أنا بعمله، ماهر أيه مصلحته من أنه يعمل كده؟ وأنا شكلي مكبر الموضوع أوي أنت أكيد بتقول كده

صح؟... باصلي كده ليه؟... أنت عندك حق... أنا كان حقي أكبر
الموضوع لأن واضح أوي أن في حاجة غلط...

عدي أسبوعين كل يوم اتكلم مع سلسبيل فيهم اطمئن عليها، عرفتھا أكثر
رغم تحفظھا في الكلام معايا، ورغم قصر المدة اللي بنتكلم معايا فيها، بس
قدرت أفهم كذا حاجة من شخصيتها بتكبرھا في عيني أكثر، زي مثلاً أنها
شجعتني بالتزامھا بمواقيت الصلاة أني اسأل نفسي أنا ناقصني أيه علشان
ما أصليش؟.. لما هي اللي في الحالة دي ولو الأذان أذن بتستأذن مني
وتروح تصلي!... كان لازم اراجع نفسي، وأرجع أصلي بانتظام تاني،
ويمكن ده سبب كبير في إني في الفترة دي أحس براحة وسلاسة في كل
حاجة بتحصل في حياتي، كبرت في نظري لما كان الوقت بيكون متأخر
وتقفل في الكلام بسرعة وأحس أنها مش حابة تتكلم في وقت زي ده
وبالفعل مابقتش أكلمھا غير بدري...

كبرت في نظري بأنها لسه حماسية، ومهما عانت من كرب وألم لسه
عندها ثقة بأن اللي جاي خير وعندها رضا بحالھا وشايفة إن ليه حكمة
حببت حاجات كتير منها، اتأكدت مع الوقت أني فعلاً حببتها، لما لقيتها
مجرد ما بتسيبني بتوحشني، لما طول الوقت هي في بالي وكل اللي حواليا
مش قادر اشوفهم لأن هي بس اللي في عينيا، كنت بعد الأيام علشان
الشهرين ونص يعدوا وتقدر تنزل الشغل وأقدر أتقدملھا رسمي حسب
التحدي اللي بيني وبين معتز، كنت كل يوم ببعثلھا علي الواتساب وملاحظ
أنھا مابقتحوش وده أنا سعيد بيه، لحد ما جه اليوم اللي عقلي بدأ يرجع
يفكر بشكل مختلف تاني، ويسترجع شكوكه اللي كانت هدبت شوية بسبب
أنشغالي بسلسبيل نفسها ومشاعري ليھا اللي بتزيد

كنا بنتكلم وذكرت في نص كلامھا أنها كتبت خطھا الجديدة علي نوت
التليفون!

-سلسبيل أنتي بتعرفي تمسكي تليفونك وتكتبي عليه؟

ردت بتلقائية

-آه بقالي يومين

--طيب أنتي ليه مش بتفتحي نت؟

سكتت وردت بارتباك قلقتني:

-أصل..أنا ماليش مزاج، أكيد لو فتحت هلاقي ناس كتير بعتالي ومش هقدر أرد عليهم.

رد منطقي، بس مش مرتاح لنبرتها، سألت:

-مالكيش مزاج، ولا في حاجة بتتفاديها علي النت؟

اندفعت:

-طارق أنت لسه برضه حاطط في دماغك موضوع الحادثة ده!! برضه في إعتقادك أني مخبية حاجة بتثبت أن معتر هو اللي ورا الحادثة حتي بعد ما مر أسابيع والموضوع أتتسي؟

تحت وسألتها وأنا جوايا تأكد أن في حاجة بالفعل وأنا إحساسي الأيام اللي فانت كان صح:

-بس أنا ماجبتش سيرة الحادثة في اللي قلته يا سلسبيل!

-- وأنا طبيعي ده اللي يجي في بالي أنه ورا السؤال ده لأن ده اللي داير في دماغك بقالك فترة لذلك قلتك كده..

أنا مابقتش فاهم حاجة وحيران جداً، ماكنش قدامي غير أني أخليها تفتح نت قدامي علشان اتأكد بنفسي أن مافيش حاجة، ومابقتش عارف ده هيحصل أزاي بس أنا سكت وعديت الموضوع علشان أعرف أفكر هعمل ده أزاي؟

كان فاضل أيام بسيطة علشان سلسبيل تفك الجبس عن أيديها اليمين وكنت مستني اليوم ده علشان تقدر تخرج واشوفها بعدها، اليوم ده انتهت المكاملة بسرعة لأنني مش عارف اتكلم وأنا جوايا اسئلة كثير، بس أنا مش هستني أن سلسبيل تجاوب عليها... أنا قررت أدور علي الإجابات بنفسي.. وخطيت كل حد في الشركة موضع شك..

كنت كل يوم بستني سلسبيل تفتح واتساب علشان شكلي ينتهي لأنه بدأ يرهقني، طول الوقت مراقب تصرفات وتحركات اللي حواليا في الشركة، تعبت... كان اليوم اللي هون عليا شوية هو اليوم اللي روحت فيه الشركة لقيت وسام بتستقبلني بعلبة شوكولاتة وهي مبسوطة جداً، الحقيقة بحب اشوف الناس مبسوطين ده بيسعدني... عرفت أن خطوبتها كانت اليوم اللي قبله علي المدير اللي كان قبلي بعد قصة حب كبيرة بينهم.. كان اسمه إيهاب تقريباً.. فرحت جداً لفرحتها، وبصراحة الشوكولاتة من ايتوال بالبندق ليها سحر خاص في تهدئة أعصابي، وكان ده عامل كبير أني افك شوية في اليوم ده... وما صدقت إني في اليوم ده هديت وفكيت كلمت سلسبيل أحكيها الخبر بس سلسبيل كانت متضايقه من حاجة، حاولت أفهم ليه متضايقه؟ بس ماأخدتش منها كلام يريحني كالعادة غامضة... توقعت تكون فتحت نت جريت علي واتساب اتأكد لقيتها مافتحتش، طب أيه!!

لحد ما عرفت منها أنها مش هتفك الجبس في الميعاد اللي كان الدكتور قالها عليه وهيأخرها أسبوع كمان... فقررت أني افاجئها وأروح أزورها

وأجيبها شوكلاتة من اللي وسام ادتلي منها في اليوم ده...وبالفعل روحت
بعد الشغل بعد ما بلغت والدها بأني رايح أزورهم

دخلت الصالون وقعدت مع والدها ووالدتها وهزرننا واتفكنا لحد ما دخلت،
كانت ماشية علي رجليها مش بالكرسي وده كان شيء فرحلي قلبي وأنا
شايفها بتتعافي وبتعتمد علي نفسها، ملامحها تعبانة وحزينة بس لسه
سلسبيل العنيدة القوية، كنت مشتاق اشوفها بشكل مش طبيعي، كنت
حاسس أني بدل ما هقولها أزيك هقولها بحبك..مش قادر استني، كنت
عايزها تعرف مشاعري...سلمت عليا وقعدنا نتكلم كلنا عن الشركة
والشغل وعن سلسبيل ونجاحها وجرأتها..كنت شايف انبهار والدها
ووالدتها بكلامي عنها وسعيد جداً ومكمل كلام علشان عارف إن ده
الإحساس اللي هي بنتنظره وعايزاه، بعد شوية سابونا وخرجوا البلكونة
اللي في نفس الأوضة يشربوا قهوتهم جوا، ويسبونا نتناقش براحتنا بس
قدام عينيهم والحقيقة حبيت أوي الحركة دي منهم، روحت كتير لأصدقاء
ليا بنات عند أهلهم بحكم تربيتي في أسرة منفتحة شويتين كانوا معظم
الوقت أهلهم بيسبونا لوحدنا عادي، لو أنا مش طارق كان سهل أضعف
قدام فرص كتير من دي...حبيت الحركة دي من أهل سلسبيل، وحبيت
كسوفها بوجودي، كنت حاسس أني عايز أصارحها في اليوم ده
بمشاعري، كنت عايزها تاخذ بالها من اهتمامي الزايد الحقيقي بيها، علي
الأقل لما ترجع الشركة يبقي عندها خلفية قبل ما أستاذ معترز يصدمها
بموضوع الخطوبة ده، فقررت أصمم أنها تفتح واتساب واحنا
قاعدين...والحقيقة كان في سبب تاني كنت عايزها تعرفه وده اللي كنت
روحلتها البيت علشان أفرحها بيه...

ما آه نسيت أقولك...ما أنا وأنا في المكتب أستاذ جاد لقيته باعتلي فويس
علي واتساب ببيلغني فيه بخبر حلو جداً ليا ورسالة أوصلها
لسلسبيل...فكان لازم أشوف رد فعلها وهي بتسمع الفويس...وأفرحها
معيا..فتحت أنت وبعثتها الفويس وقتلتها بابتسامه:

-افتحي واتساب حالاً يلا بدون نقاش

ملاحمها أتغيرت وأرتبكت وسألتي برعب خلاني أفقد ابتسامتي:

-إيه؟ ليه؟.. لا مش هفتحه...

-- مش هفتحي ليه يا سلسبيل؟ في أيه مش عايزة تشوفيه علي النت؟

توترها زاد وحاولت تخفيه عني بس نظرتها اللي بتهرب مني بتبين إن في حاجة كبيرة ورا أنها ماتفتحش النت كل المدة دي.. ألحيت عليها تفتحه وبدأنا ننفلج قصاد بعض، خطفت منها التليفون اترعبت وبصتلي بخوف خلاني عايز أكسر كل اللي حواليا من القلق، قتلها بحدة:

-يا تاخدي تفتحي النت قدامي حالاً يا هفتحه بنفسي وهفهم في أيه برضه..

بكت.. وبكاها خلي قلبي هيقف من الخوف، أيه راعبها من إنها تفتح النت بالشكل ده؟ قالتلي أنها هتفتحه وادتها الفون، وأنا مستني.. فتحت الواي فاي وبدأت الاشعارات والمسدجات توصلها، كانت فاتحة الشات بتاعي والرسائل عمالة توصلها، دموعها بتزيد وهي بتلمح بعض الكلمات من رسائلي وباصة باندهاش للشات وأنا باصصلها بترقب وبحاول أهديها لكنها مايتبصليش لحد ما مرة واحدة وصلتي رسالة منها، استغربت... ببص علي الشات من بره لقيت فويس مبعوت منها، سألتها بحيرة:

-إيه الفويس ده وبعنيه أمتي؟

بصتلي وزاد بكاءها وساكتة، قلبي اتقبض وأنا باصص للشات وهي بترجاني ما أفتحوش، وأنهارت كلياً بعد ما سمعته قدامها وكل غضب

وَألم الدنيا أتملكني في اللحظة دي... وعرفت وقتها هي ليه ماكانتش عايزة
تفتح نت طول الفترة دي.

8 والأخير

دخل والدها ووالدتها علينا وأنا بزقق ومش عارف أتمالك أعصابي
وواقف قدامها وهي قاعدة بتبكي علي الكرسي مش فاهمين في أيه، كل
اللي بعمله أني بتكلم بحزن وثوران:

-أزاي ده يحصل وما تتكلميش؟.. أزاي تستحملي كل ده لواحدك
وتسكتي؟... أزاي سايباني هموت من الحيرة وساكتة طول الوقت؟

مابتكلمش وبتبكي بس ومامتها حضناها وبتهديتها، ووالدها عمال يسألني
علي اللي حصل وبيحاول يهديني، مش قادر أهدي، مش عارف أتمالك
أعصابي

-اتكلمي.. ليه عملتي كده؟

صرخت:

-علشان أنت ماتتنديش، علشان هو جه وهددني وأنا في المستشفى قبل ما المباحث تعرف مني التفاصيل، وقال أنك لو عرفت حاجة أو المباحث عرفت حاجة هيقنالك حتي لو أتقبض عليه علشان عنده ناس برا يقدروا يعملوا ده... علشان كان هيئذيك ويئذي أهلي وأنا كان لازم أفكر بشكل مايئذيش حد حتي لو أنا اللي هتئذي..

بصتلها وأنا في قمة حزني وغضبي، ماقدرتش أتكلم كلمة واحدة، سيبتها ومشيت وأهلها بيحاولوا يفهموا منها هو مين وبنتكلم عن أيه؟

ركبت عربيتي مش قادر أسوق من دموعي، أزاي يعمل فيها كده؟ وأزاي هي عانت كل ده لواحدتها بسبب واحد مريض نفسي، نار متملكاني عايز أفجرها فيه، بسوق بسرعة كبيرة علشان كان لازم افرغ طاقتي بأسرع وقت واتصرف، ما همنيش اللي هيحصل، وصلت للمكان اللي لازم أفرغ اللي جوايا فيه، خبطت بكل قوتي علي الباب وطفل صغير اللي فتحلي، من غير مقدمات زقيت الباب وفضلت أنه علي ماهر لحد ما خرجلي وأول ما خرجلي وشوفته ماحدث عرف يسكتني، الجيران أتلموا وأهله وماحدث عرف يهدي غضبي، كان مذعور، مش فاهم أيه اللي أنا بعمله ده؟ فرغت نسبة صغيرة من اللي جوايا وخرجت من البيت عنده بأعجوبة وأنا مش شايف قدامي...سلسيل فضلت ترن عليا طول اليوم ماكنتش قادر أرد عليها، مش عارف ارتاح ومش هسكت إلا أما أجيب حقها...

اتخضيت صح؟...أكيد اتضايقت زيي أنت كمان لما عرفت مش كده؟...ماهر صاحبك أنت كمان، أكيد ما يعملش كده، ومالهوش مصلحة في كده...أنا عارف أنها صدمة، ثانية بقي نركن علشان وصلنا...لا ماوصلناش المكان اللي رايعينه، هتفهم دلوقتي بس استني دقيقة...أصلاً بكره يوم مهم جداً تعرف ولا لا؟...أكيد هي بلغتك زي ما بتبلغك بكل حاجة...بس هقولك برضه، النهاردة بعد ما هنروح المكان اللي رايعينه ده

هتقدر سلسبيل تخرج من بيتها بدون خوف منك... هتقدر تمسك المنصب بتاعها اللي أنت كنت مش عايزها تاخده وماكنتش عارف أصلاً أنها هتوصله بالسهولة دي، طبعاً هي الأيام اللي فاتت ماكانتش قادرة تفرح بده من بعد ما بعثها الفويس اللي بعتهولي أستاذ جاد وهو بييشرنى بأن الصفة بتحقق نجاح واسع وإنه هيرقيني وابقى مدير العلاقات العامة للفرع التاني للشركة وأني أبلغ سلسبيل انها تشد حيلها علشان تمسك مدير العلاقات الخارجية مكاني، لا أوعي تقول أنك اتفاجئت!... هي مالحقتش تقولك ولا ايه؟... آه نسيت صح ما هو ماحدث يعرف غيري أنا وسلسبيل وأستاذ جاد وطبعاً أستاذ معتز اللي بعد اللي شافه مني ساعدني أنول منك بكل سهولة...

أيه ده، أهو ماهر جه أهو، تعالي يا ماهر... برضه ما بتتعلمش مش قلنتك مليون مرة تقفل باب العربية براحة يا مغفل!... أسكت يا ماهر مش كنت لسه بحكيه عن يوم ما جيتك من عند سلسبيل وغضبان وبزق وأكسر والجيران اتملوا وحاولتوا تهدوني بالعافية....

--لا ما أنت هتدفع تمن الحاجة اللي كسرتها دي علي فكره خد بالك

ههههه أنت متنح ومرعوب ليه؟... آه ده ماهر، صاحبك اللي جابك شقته أمبارح اللي هي شقتي أصلاً وسكرت فيها وحكىته أنت عملت أيه في سلسبيل وأزاي وليه!... ده ماهر اللي بقاله أسابيع بيستدرجك ويقرب منك أكثر علشان يوصل بيك لهنأ وأكسر عضمك من الضرب وتبقي قاعد قدامي متكفف، مزلول، بتتألم مجبر تسمع كل التفاصيل دي مني قبل ما تنول جزاءك، استني بقي أما أسمعك الفويس اللي كانت مسجله سلسبيل علي حظك وقت الحادثة... أيوا الريكورد اللي كانت فتحتة ولسه هتتكلم فيه السواق اللي أنت متفق معاه يقولها إن الشركة اللي بعتهأ ليها يوصلها وقتها زاد سرعته وهي نسيت الريكورد مفتوح، وقبل ما العربية تنقلب بثواني أتبعث ليا.. فاكراه!

أسمع أسمع...

(- لو سمحت ممكن تخفف السرعة؟... يا أستاذ... أيه ده في أيه؟... بقولك خفف السرعة مش زودها... أنت يا عم أنت بتعمل أيه هنموت كداااه...)

--علشان تبقي عملي نفسك بنفهمي أوي وتبوظي اللي أستاذ إيهاب كان بيعمله، بعد كده لو عيشتي بقي أبقى أتعلمي ما لكيش دعوة بمناصب حد، اعتبري ده عقاب ليكي علي اللي عملتيه وقرصة وذن علشان تتلمي وتقعدي في بيتك أحسن... *صريخ سلسبيل*...

-ايهاااب ميبين؟ استننيي انت رايح فيبين؟؟ يا طارارق... الحقوناااي)

استني بقي أما أدور العربية علشان خطوتين وهنوصل للقسم...ايه مرعوب كده ليه وفاتح عينك أوي ليه؟ وبنترعش كمان..ماكنتش متوقع إني هعرف إن أنت اللي عملت كده يا إيهاب؟...ولا ماكنتش متوقع أني هوصلك وأجيبك وأحبسك؟...ولا متفاجئ من إن ماهر هو اللي خدعك وجابني ليك؟...طبعاً ما أنت صدقت اللعبة اللي عملناها عليك بمساعدة أستاذ معترز ووصلتلك تفاصيلها وسام...حبيبتيك، طبعاً دخلت عليها وعليك فكرة إن معترز طرد ماهر من الشركة وهو حالف لينتقم منه...وطبعاً ماهر أتكلم مع وسام بدافع الفضفضة وأنه عارف أنك مظلوم وإنه جه عليك، واتكلمتوا أنت وماهر وقربتوا من بعض بدافع أنكم تنتقموا من معترز وتلاقوا شغل سوا بعد ما فقدتم شغلكم بسببه...

بس يا سيدي...وصلنا، مرحباً بيك في المكان اللي تستحقه...قبل ما اسلمك دلوقتي لازم تعرف حاجة مهمة أوي، ربنا مش بيضيع حق حد مهما طال الميعاد الحق بيرجع...ربنا عدل، أنت كنت بتلعب لعبة قذرة ومارضتش بالحلال، بس سلسبيل اجتهدت وعشان تعبت، ورضيت، وسعت ربنا كان مخبيلها كل ده علشان تتكافيء في النهاية بمنصبها...أينعم دفعت قدامه تمن كبير بس صبرت ورضيت بقضاء ربنا فكافئها...أنت هتقضي مدة من حياتك في السجن، وحبيبتيك اللي كانت بتنقلك الاخبار وبتساعدك دي

هتتول جزاءها معاك...وبشكركم بجد علشان في النهاية كنتم سبب كبير في
إن حياتي تبقي ليها أهمية، وسلسبيل تتول اللي بتسعاله وأنا أنول
رضاهها...

كان نفسي تحضروا الاحتفالية بكره وتشفوني وأنا بطلبها للجواز، بس أنتم
خلاص دوركم وقف لحد هنا...هستناك لما تخرج من السجن يا
إيهاب...لينا حساب بعد ما القانون يحاكمك هنصفيه سوا...ماحدث يمس
شعرة من سلسبيل بأذي وأسبب حد تاني ياخذ حقها منه علشان تبقي
فاهم...

طبعاً أنت بتقرأ دلوقتي ومستني تعرف أيه حصل بعد كده وأيه حصل
الفترة اللي فاتت من بعد ما روت لماهر البيت وحقك عليا أقولك بدل ما
أنا مصدعك معانا علي الفاضي..

أنا بعد ما أخذت إيهاب القسم أنا وماهر وهو متكفف وضار بينه، سلمته
وقبله كان ماهر مسلم الفيديو اللي مسجلينه ليه وهو بيحكي مع ماهر في
التفاصيل وهو سكران في شقتي بليل قبل ما أخرج عليهم وأقفل الفيديو
وأضربه بغل من اللي قاله واعترف بيه، كان ماهر وأنا بضربه أخذ
التسجيلات وراح علي القسم اللي المحضر اتقفل فيه من بعد أقوال سلسبيل
وهي في المستشفى، القضية اتفتحت تاني وهو بلغهم بكل اللي عملناه
وبلغهم بأني جايه وجاي في السكة، وخرج قابلني علشان يشيله معايا
علشان كده قابلني قبل ما أوصل القسم بخطوات...

روحت البيت وكلمت سلسبيل يومها أطمئنها إني سلمت إيهاب للبواليس
وإنها ما تقلقش من حاجة، وإني هعدي عليها تاني يوم أخذها ونروح
الشركة علشان في حفلة صغيرة في الشركة من أستاذ معتر وأستاذ جاد
تكريماً لينا لنجاح الصفقة وإعلان ترقياتنا، كان عندها تساؤلات كتير زيك
دلوقتي بس أنا كنت رخم ومصر أبلغها لما أشوفها...

عارف لما تدخل دوامة كبيرة جديدة عليك وتحاول تستوعب مرة واحدة
أيه اللي أنت عايشه ده؟ حاسس بأنك في فلم مش حياة واقعية... بتراجع
كل التفاصيل اللي فاتت مش مصدق أيه اللي بيحصل ده؟ هي دي حياتك
فعالاً!! ده كان شعوري وأنا قاعد في العربية بستعد أسوق واروح أستقبل
سلسبيل ونروح الشركة علشان تبدأ تفاصيل حياتنا الجديدة...كنت فرحان
رغم توتري الشديد من إن أي حاجة من اللي مخططها ماتطلعش
مضبوطة، سوقت ووصلت وقفت تحت البيت مستنيها تخرج، رنيت عليها
لقيتها بترد وتقولي أنت فين مش شيفاك أنا قدام العمارة، ضحكت وخرجت
من العربية علشان أشوف ملامح المفاجأة مرسومة علي وشها، سألتني:

-فين عربيتك؟

شاورتها علي العربية وأنا فاتح الباب وواقف قدامها، استغربت وسألتني:

-فين ال E36؟

--مافيش اسئلة، كل حاجة هتعرفيها لما نوصل الشركة..

دخلت ركبت في الكرسي اللي جنبي، بطقم فورمال وخمارها اللي كانوا
وحشوني، سلسبيل رجعت تاني أخيراً، فاضل بس تفك الجبس عن أيديها
الشمال وتبقي سلسبيل اللي أول يوم شوفتها خطفتني، قبل ما نوصل
الشركة طول الطريق شاردة ومتوترة وحسيتها مش هتقدر تستني تفهم لما
نوصل قتلها:

-ممکن تسأليني في أي حاجة كنتي عايزة تسألني فيها أمبارح وهجاوبك لحد
ما نوصل الشركة.

بصتلي وسألت وكأنها كانت مستنياني أقولها كده:

-الفترة اللي فاتت أنت ماردتش تعرفني أنت هتجيبلي حقي أزاي من أيهاب، وإمبارح جيت وقلت أنك خلصتني منه، فهمني عملت ده أزاي؟

اتنهدت وابتسمت وقلت لها:

-يوم ما خرجت من عندك روحت لماهر البيت وفقدت أعصابي عنده، وقتله وسمعته الفويس، ساعتها ماهر أتصدم وقال لي أنهم وقت ما كان إيهاب شغال في الشركة كانوا زمايل، ماتوقعش يكون هو اللي ورا الحادثة ومابقناش عارفين سبب أنه يعمل فيكي أنتي كده أيه؟

ساعتها ماهر قالي أفهم منك لما جه المستشفى وهددك هددك بأيه وليه؟
ساعتها أنتي قلتلي أيه؟

ردت:

-قلتلك أن في واحد جه أنا ما عرفهوش و قالي لما سألته هو مين، أن لو قولت أي حاجة للمباحث غير اللي هي قولها لي هيكون الحادث الجاي لأبويا وأمي وساعتها هعرف هو مين ففهمت أنه اللي اسمه إيهاب، ولما قلتله أن معايا دليل وهوديه في داهية وأناي مش خايفة منه ماصدقش، ولما حلفتله إنني كنت هبدأ أسجل فويس ليك والسواق بدأ اللي كان بيعمله والحادثة حصلت وأن الفويس اتبعثلك بس لسه ماوصلكش لأنني ماكنتش فاتحة نت وقتها علشان باقتي كانت خلصانة...هددني وقالي أن لو الفويس وصلك هيقتلك أنت، ومش هيتردد يقتل بابا وماما معاك حتي لو هو في السجن....

وقالي أني لو فكرت أرجع الشركة تاني برضه مش هيتردد في انه
يئذيكم...

قاتلها:

-حلو.. أنا لما عرفت منك الكلام ده تاني يوم لما هديت شوية، اتكلمت مع
ماهر واتفقنا أننا نلعب علي إيهاب، ماكنتش هقدر اسيبه أو اسلمه للبوليس
من غير ما أفرغ شحنة الغضب اللي جوايا فيه وأفهم ليه عمل معاكي أنتي
كده؟ مع إن أنا اللي المفروض أكون هدفه؟

روحت لأستاذ معتر وسمعتة الفويس وأعتذرتله بجد المرة دي، والحقيقي
كان متعاون ومتفاهم جداً وهو اللي أصر يساعدنا، اتفقنا إحنا ال3 علي
اللي هنعمله، عملنا تاني يوم خناقة كبيرة مزيفة بين أستاذ معتر وماهر في
الشركة... كل اللي ا في الشركة شافوا وسمعوا اللي دار وشافوا ماهر وهو
بيطرد، وبحكم إن وسام وماهر مقربين شوية هي جريت وراه علي مكتبه
واتكلم معاها بغضب عن إنه هيخرب بيت معتر، وإنه عارف إن إيهاب
مظلوم وأنه مايستحقش ده من معتر، وقالها أنه هيروح يشتغل مع شركة
منافسة ليهم ويخرب بيته... ساعتها طبعاً هي نقلتله الأخبار وهو اللي راح
لماهر برجله، كان هدفنا حاجة معينة وهو شبك في الصنارة بسرعة لأنها
جت معنا ضربة حظ...

سألتنني:

-ضربة حظ؟؟

--اللي عرفناه بعد ما إيهاب قرب من ماهر واتقابلوا عندي في الشقة
علشان يفهموا هو ناوي علي أيه، علي اساس الشقة دي شقة ماهر مش
شفتي، بعد كاسين تلاتة شربهم إيهاب وسكر بدأ يتكلم وقال لماهر أنه فكر

الشركة اللي هتعيينه هي نفس الشركة اللي أطرده مخصوص علشان يتعين فيها بمنصب أعلي ومرتب أعلي...

بصتلي سلسبيل بدهشة وسألت:

-يعني أيه؟ يعني إيهاه إطرده بإرادته؟

ضحكت علي إندهاشها وردود أفعالها الطفولية وقتلتها:

-إيهاه كانت أكبر شركة منافسة لشركتنا متفقين معاه يعينوه عندهم في منصب وبمرتب عالي لو خسر شركتنا الصفقة دي وأقنع الوفد يتعاقدوا مع الشركة المنافسة، فلعب في دماغ معتز بان سعر صفقة الدوا دي عالي وقاله نقلل السعر معاهم، وأخذ منه الإذن وراح خرب الدنيا مع الوفد علشان يتخانقوا مع معتز بعد ما إيهاه ولع الدنيا مايبينهم بخبث، ولما مشيوا متضايقين نزل وراهم وقالهم علي إن الشركة الثانية جاهزة تتعاقد بنفس السعر..وبعد ما أقنعهم وخرجوا من الشركة هو شافك وأنتي واقفة معاهم وماكنش عارف أنتي مين وبتعملي أيه، لحد ما أنتي قلبتي كل الموازين علي دماغه...فكان عايز يتخلص منك كعقاب ليكي علي اللي عملتيه، وعلشان اللي تاخذ المنصب مكانك وسام...

كنت شايف ملامح الحزن، والقرف، والدهشة، ونظرة عدم التصديق علي وشها ومبسوط من إن كل ده خلاص هيزول وهترجع تظمن تاني...قالت:

-أنا مش متخيلة إن كل ده حصلي وبيحصلني، أنا حاسة إنني في كابوس بجد..

--خلاص يا سلسبيل، كل ده أنتهي وعدي واللي جاي هيكون حلو بإذن الله
ما تقلقش...

خرجنا من العربية وتعمدت أركن في مكان مختلف بعيد عن مكان كل
مرة، ودخلنا الشركة الكل كانوا متجمعين في الريسبشن، مشروبات
وشوكولاتة وزينة... دي احتفالية بجد بقي!..كنت سعيد جداً بملامح الفرحة
اللي مناسبة ملامحها الجميلة... استقبلوها بالترحاب، وبعد ما وقفنا وهزنا
وضحكنا جه أستاذ معترز وأستاذ جاد سلموا علينا، وقف قدامنا معترز
وبصوته وبكرشه اللي حفظناهم بص لسلسبيل بابتسامه وقال بصوت
عالي:

-ياترا هتقبلي أعتذاري يا استاذة سلسبيل؟ ولا هتخلي شكلي وحش قدام
الشركة كلها؟

ابتسمت برقة وقالت بود:

-اعتذارك وصلني قبل النهاردة يا أستاذ معترز...حضرتك زي والدي وأنا
مقدرة وقفتك دي جداً ومتقبلة الأعتذار أكيد.

وقف في وسط الموظفين وقال بصوت أعلي موجه كلامه ليهم وأنا مراقب
المشهد بحب:

-طيب أنتشن بليز.. أنا جمعتم النهاردة لكذا سبب، طبعاً كلكم عارفين إن
التحدي كان إنهم يرجعوا الصفقة، وأنا أعتذر لسلسبيل وأعينها في الشركة
لكن الحقيقة كان في بند كمان متفق عليه في التحدي...وقبل ما أقول البند
ده أنا وأستاذ جاد واقفين دلوقتي علشان نقولكم تباركوا لطارق لأنه اترقي

بمناسبة إن الصفة ناجحة نجاح غير متوقع ومن بكره هيكون مدير العلاقات العامة للفرع اللي في زايد... وسلسبيل هتستلم مكانه.

الكل كانوا بيباركوا لينا والأجواء كانت مرحة ولذيذة وكنت سعيد بسعادة سلسبيل أكثر من سعادتي بالمنصب الجديد ليا، كنت واقف ملهوف جداً أشوف رد فعل سلسبيل علي كلام أستاذ معتر معاها عني.. فجأة قطع دوشتنا أستاذ معتر وهو بيقول:

-أما بقي البند الثاني من التحدي... فكلامي هيكون موجه لسلسبيل بس عايزكم تكونوا حاضرين..

الكل انتبهوا للكلام وعلي الأخص سلسبيل اللي كانت بصاله ومنصته لكلامه وأنا واقف جنبها مبتسم وقلبي بيدق بسرعة، ماكنتش عارف الصيغة اللي هيتكلم بيها فاتفاجئت وهو بيقولها:

-مش عارف تعرفي ده ولا لأ، بس طارق ابن صديق دراستي الله يرحمه، عندي زي أبوه بس بعنبره أبني وصاحبي رغم اللي شوفتية من معاملتنا مع بعض، وعلشان كده أنا بقولك دلوقتي... الواد ده بيحبك، وماشوفتش حد طارق حبه بالشكل ده، وعايزك تجهزي علشان أنا هطلبك من والدك ووالدتك النهاردة علشان تكوني زوجة لطارق ابن صديقي وابن شركتنا..

كان أول مرة أشوفها خجولة كده والكل باصين لينا وبيسقفوا، صوت الصغير والتسقيف والتهليل والفرحة أتخلدوا في ذاكرتي مع وشها الأحمر وابتسامتها، ونظرتها اللي مليانة حنية لما بصتلي وغمزتلها ورجعت بصت في الأرض تاني، كنت حاسس أنني فزت فعلاً في التحدي... تحدي أنني أكسب قلب زي قلبها، تحدي أنني أبطل أدور علي الحب والحاجة اللي علي مزاجي وهي هتجيلي لوحدها في الميعاد اللي ربنا كاتبه... بعد ما الكل

رجعوا شغلهم أخذت سلسبيل وخرجنا من الشركة من البوابة اللي كانت بتخرج منها كل يوم علشان أروحها البيت تجهز قبل ما أجي ميعادي مع أهلها علشان أخطبها، وأحنا بنخطي خطواتنا لبرا قالتلي:

-تعرف أيه هي خطتي اللي كنت كتبتها في نوت التليفون قبل ما أفك الجبس؟

سألتها وإحنا مكملين في خطواتنا:
-أيه؟

ردت بكسوف:

-أني أوافق علي طلب المدير بتاعي لأنني تأكدت أنه فعلاً مهتم لشغله زيي..

وقفت مرة واحدة باندهاش وقلبي بيدق، مش مصدق أن اللي فهمته صح، سألتها علشان أتأكد:
-أنتي تقصدي..

-أنا كمان بحبك وموافقة...

ابتسمت جامد لما قالتها وجريت من قدامي من الكسوف خرجت برا، خرجت وراها لقيتها واقفة قدام ال bmw E36 بتاعتي، والمركونة في مكانها المعتاد، أول ما شافنتي لقيتها بتقولي بحماس وتعجب في نفس الوقت:

-الE36 !

اصتنعت شخصيتي القديمة وقتلتها بحدة:

-حضرتك تفحصتي العربية كويس النهارده؟

بصتلي بشك وهي رافعة حواجبها، لفت بهدوء حوالين العربية لحد ما وصلت لضهرها وبصتلي بفرحة وحماس وبنبرتها المبتهجة قرأت إعلان البيع اللي علي العربية:

-(العربية للبيع...مش ليك أنت ياللي بتقرأ الإعلان، دي لسلسيل بس..للتواصل هتلاقيني عندكم في البيت النهاردة)

تمت بحمد الله.. 